

## PASIUNA

Sugod pa sa 1992 ang Ginoo nagsugod paggamit kanako pagministeryo sa dako nga Lawas ni Kristo ug akong nakita nga sa daghang mga ka-Iglesiahanan daghan pa sa ilang mga miyembro ang mga bata pa kaayo sa Ginoo bisan ug dugay na sila nga mga Kristohanon Ubay. ubay sa mga gitawag nato ug mga anak sa Dios karon nagakinabuhi pa sa "Upat ka P." Unsa kining "Upat ka P"? Pasinaw, Paminaw, Pauli, ug Pabadlong." Bitaw, mora ug katawanan kini apan mao kana ang tinuod nga kahimtang sa daghang mga magtutuo. Dako nga parte sa Lawas ni Kristo ang wala pa nagbaton sa bunga sa Espiritu ug wala pa naga-ebanghelyo mao nga ang ilang komunidad wala pa nakasinati ug kabag-ohan.

Ang atong gikinahanglan aron kita mohamtong dinha sa Ginoo mao ang saktong mga pagtulon-an gikan sa Biblia (2 Timoteo 3:16-17). Pagtulon-an nga mohatag kanato ug kausaban sa kinabuhi, Nagtuo ako nga pinaagi niining 48 ka mga leksiyon sa **PAGSANGKAP** matabangan ang kadaghanan nga maminaw ug motuman unsay ginasuti sa Espiritu sa ilang tagsatagsa ka kinabuhi. *Ang tumong nini nga libro mao ang pagsangkap kanato aron mapalalom pag-ayo ang atong relasyon sa atong Amahan sa Langit ug makatuon kita pagtrabaho uban kaniya.* Isip mga anak sa Dios kinahanglan magbaton kita sa iyang kinaiya, kaalam, gahom, ug katuyoan.

Sa 48 ka leksiyon sa **PAGSANGKAP**, adunay 9 niini nga akong nakuha gikan sa mga "English" nga libro nga akong gihubad sa "Visayan" kay akong nakita nga gikinahanglan kaayo kini magamit sa gagmay'ng grupo. Ang 1 ka leksiyon nakuha nako sa wali sa akong

higala nga pastor. Apan ang kadaghanan niini akong nakuha gikan sa Espiritu sa Dios samtang naminaw ako unsay akong iwali sa panimbahon sa Domingo. Sugod sa 1997, ang tanan nakong wali sa "Sunday Service" akong ginabutang sa "computer" ug ginaprinta aron among magamit sa mga "cell groups." Kini nga mga leksiyon nasulat sa "Visayan" tungod kay adunay mga miyembro nga dili kaayo makasabot sa pinulongang "English" Pipila niini nga mga pagtulo-an mao na kining anaa sa **PAGSANGKAP**. Kini nga mga pagtulon-an dako kaayo ug kahimoan sa lokal nga iglesia diin ako gibutang sa Dios nga mangulo. Wala lang nanaghan ang mga miyembro sa iglesia apan nanaghan usab ang mga pangulo (cell leaders) nga nanagdala ug gagmay nga grupo (cell groups). Daghang kinabuhi ang naluwas nabag-o ug nangalagad na sa Ginoo. Akong nasabtan nga gihatag kini nga mga leksiyon sa Espiritu dill lang para sa akong lokal nga iglesia apan para usab sa mga ka-iglesiahanan nga nanginahanglan ug mga pagtuon-an aron ang ilang mga miyembro mohamtong ug magamit sa Ginoo.

Ang tubag sa pag-ani sa daghang mga kalag ug sa kausaban sa atong katilingban dill ang "daghang mga programa sa atong ka-iglesiahanan kondili "daghang mangangani" (Mateo 9:36-38). Kini nga mga mangangani (harvesters) dil lang dihadhiha nga motindog Kinahanglan sila ug pagsangkap aron sila makatuman sa katuyoan sa Dios, Kinahanglan kita ug han-ay ug klaro nga mga leksiyon aron adunay magamit ang Espiritu sa Dios sa ilang mga kinabuhi. Nagtuo ako nga kung ikinabuhi lang ang mga pagtulon-an niini nga libro mohatod kini ngadto sa "*dako nga espirituhanon riga pagkapukaw*" sa atong mga pamilya, ka-iglesiahanan, komunidad, siyudad, ug nasod.

**Noel P. Alkuino**

## Unsaon Pag-gamit ang 'PAGSANGKAP'?

Sa Lord of the Harvest Christian Community, ang lokal nga iglesia diin gitawag ako nga mangulo adunay duha ka paagi nga among ginasangkap ang matag magtutua. Ang una, mao ang pagsangkap sa mga miyembro nganha sa gagmay nga grupo (*cell groups*) ginamit kining mga pagtulon-an sa **PAGSANGKAP**. Ang mga nagatudlo nini nga mga leksiyon mao ang mga pangulo sa gagmay nga grupo (*cell leaders*).

Ang ikaduha nga paagi sa pagsangkap ginatudlo sa “dagko nga mga panagtigom” (*classroom training*) nga gitawag ug **Ladder of Success**. Usa kini ka tuig nga pagsangkap para ang miyembro mahimong usa ka pangulo sa gagmay nga grupo (*cell leader*) ug mahimong pangulo sa mga pangulo (*G12 Leader*). Ang mga leksiyon niini nga pagbansay ug pagsangkap gisulat ni Pastor Cesar Castellanos ang pastor sa Mission Charismatica International sa Bogota Colombia nga mao na karon ang ikaduhang pinakadako nga lokal nga iglesia sa tibuok kalibotan.

Ang mga leksiyon nga ginatudlo nini nga “training (*Ladder of Success*)” mas lalom ug mas bug-at mao nga ang motudlo niini nga hamtong na nga pangulo sa iglesia (*Efeso 411*), Ang estudyante nga naga-apil niini nga “training” ginadasig nga mopadayon pag-apil sa gagmay nga panagtigom (*cel meeting*) samtang naga-apil usab siya sa hinugpong nga pagsangkap (*classroom training*). Kung andam na sila modala ug gamay nga grupo ang ilang gamiton nga mga leksiyon pagtudlo ngadto sa ilang mga miyembro mao kining **PAGSANGKAP**. Mao kini karon ang atong tun-an. Unsaon paggamit nini nga mga leksiyon sa gagmay nga grupo?

1. Kaniadto ang among ginagamit nga mga leksiyon sa gagmay nga grupo (*cells*) mao ang wali sa Domingo nga panimbahon (*Sunday preaching*) pero karon dili na. Tungod kini kay usahay adunay mga wali sa Domingo nga dili haom sa mga panginahanglanon sa mga miyembro sa gagmay nga grupo. Mas maayo nga adunay sakto nga han-ay (*Curriculum*) asa a nimo dad-on ang imong mga miyembro sa “cell group” o Bible study.

Una sa tanan, kung pangulo ka sa gamay nga grupo kinahanglan magbaton ka ug panan-won animo dad-on ang imong miyembro ug tan-awa ang **PAGSANGKAP** nga imong instrumento pagkab-ot niini. Unsay atong tumong pagdala ug gamay nga grupo? *Paghimo ug hamtong nga mga disipolo ni Kristo nga mohimo usab ug daghan pang mga disipolo* (Mateo 28:19-20).

2. Ang Tumong sa mga han-ay sa **PAGSANGKAP** mao ang paghatod kanato sa “kaluwasan”, “paghamtong”, “kinabuhi nga madaogon” ug “kinabuhi sa pag-alagad”. Ang matag han-ay o “series” adunay klaro kaayo nga tumong.

- I. **Salvation Series** --- adunay tulo ka tumong niini nga han-ay. (1) Kaluwasan sa wala pa naluwas, (2) saktong pagsabot unsay katuyoan sa kaluwasan, ug (3) ang pagtukod sa mga naluwas na nga mowali usab ug kaluwasan ngadto sa uban.
- II. **Maturity Series** --- ang tumong niini nga han-ay mao ang pagtudlo sa mga magtutua ug mga “espirituhanong disiplina” aron matangtang ang

tanang dill maayo nga mga batasan. Kay ang mga daotan nga batasan mawala lang kung mapulihan kini ug mga maayong batasan nga makapalalom sa atong relasyon sa Dios.

III. **Victorious Life Series** --- dinhi ang mga magtutuo matudloanunsaon pagpuyo nga madaogon sa tanang aspeto sa ilang kinabuhi.

IV. **Discipleship Series** --- ang tumong niini nga han-ay mao ang pagtudlo sa mga Kristohanon nga ang tanan gitawag pagbuhat sa katuyoan sa Dios dinhi sa yuta.

3. Dili kinahanglan subayon nimo pag-ayo ang han-ay apan paminaw sa Espiritu unsay kahimtang sa imong mga miyembro ug itudlo ang sibo sa lang mga gikinahanglan. Pananglitan, lima na ka semana ang imong "cell" o "Bible study" ug nakahuman na kamo sa lima ka leksiyon sa "*Salvation Series*". Sa hapit na mahuman ang inyong panagtigom imong nasabtan nga gilutos ang imong mga miyembro sa ilang mga pamilya nga wala pa makasabot unsay inyong ginabuhay. Unsay imong buhaton? Mopadayon ka ba pagtudlo sa "*Lesson 6*" sa "*Salvation Series*" sunod semana? Adunay pagtudlo mahitungod sa "*Paglutos*" pero atua pa kini sa "*Lesson 2*" sa "*Victorious Life Series*". Puwede ka ba mo-ambak sa han-ay sa mga leksiyon ug mogamit niin? Puwede kaayo. Kay ang ilang gikinahanglan nga pagtulon-an mahitungod man sa paglutos mao kini ang itudlo.  
**Katula asa sila nangatol!**

Bisan ug wala nimo nasubay ang han-ay walay problema, ang importante nga natagbo ang panginahanglan sa imong mga

miyembro. Kung ang ilang gikinahanglan nga leksiyon mahitungod sa "*Pagpasaylo*" mao kini ang itudo. Kung gusto na nimo sila tun-an sa "*Paghatag*" mao kini ang tudlo. Kung gusto nimo sila makatuon sa "*Pag-ampo*", itudlo ang tulo ka leksiyon sa pag-ampo (*Maturity Series, Lessons 1.2.& 3*). Ayaw kagapos sa han-ay kondili paminaw sa Espiritu ug sa mga gikinahanglan sa imong mga miyembro. Adunay 48 ka leksiyon sa imong mga kamot ug dili kinahanglan nga isubay gyod nimo kini pagtudlo. Pagtudlo sibo sa giya Ginoo aron makakita ka ug maayo nga bunga sa imong kahago. Ayaw lang pagtudlo unsay '**gusto nila madunggan**' kondii unsay '**gikinahanglan nila madunggan ug makinabuhi**'. Ang hamtong nga pangulo kahibalo maminaw sa Espiritu unsa nga mensahe ang iyang ihatag ngadto sa iyang mga miyembro. Kahibalo usab siya mohatag niini nga mensahe sa klaro ug tin-aw nga paagi.

4. Adunay panahon nga ang usa ka leksiyon dili ninyo mahuman sa usa lang ka sesyon tungod kay taas kini ug nindot kaayo ang inyong mga panag-ambit, busa taposa na lang kini sa sunod ninyong panagtigom. Ayaw puga paghatag ang dili na madawat.
5. Mas maayo sad kaayo kung ang matag miyembro sa imong "Cell" o "Bible study" adunay kopya sa **PAGSANGKAP** aron maka-apil sila pagbasa sa leksiyon (*participate*), mas taas ang ilang makuha sa leksiyon (*retention*), ug aduna sad sila'y masubli pag-uli sa ilang balay (*review*).
6. Ayaw kalimti ang pagamit sa, "*Pag-aplikar nga mga Pangutana*" sa kinaulahan. Mao kini ang pinaka-importante nga parte sa inyong pag-inambitay. Ang pag-aplikar sa mga

kamatuoran nga natun-an. Dinhi tugoti ang tagsatagsa ka miyembro nga mopa-ambit sa ilang mga kasinatian ngadto sa tanan sibo sa pagtulon-an nga nahisgotan. Human ang tanan nakasulti ug nakapaambit na, ibalik ang mga importante nga punto sa leksiyon ug itapos ang panagtigom sa pagministeryo ug sa mga pag-ampo.

# **SALVATION SERIES**

- 1. KINABUHI HUMAN SA KAMATAYON**
- 2. KALUWASAN**
- 3. USA LANG KA DALAN**
- 4. MGA PANGUTANA MAHITUNGOD SA KALUWASAN**
- 5. KALUWASAN: MAWALA BA O DILI NA?**
- 6. TULO KA ASPETO SA KALUWASAN**
- 7. PITO KA TIMAILHAN SA TAWO NGA LUWAS NA**
- 8. ANG PLANO SA DIYOS**
- 9. PAGKATAWO PAG-USAB**
- 10. ANAK SA DIOS**
- 11. LANGITNONG AMAHAN**
- 12. BAUTISMO SA TUBIG**

## KINABUHI HUMAN SA KAMATAYON

(Salvation Series: lesson 1)

Ang **pisikal nga kamatayon** mahitabo bisan asa, sulod sa imong panimalay. Kini moabot sa bisan unsang takna, **buntag, udto, hapon, gabii o kaadlawon**. Moabot kini sa tanang tawo , **bata o tigulang , babaye o lalaki, dato o pobre, ilado o dili ilado**. Walay pilion ang kamatayon. Nagkalain-lain ang paagi sa Pag-abot niini, **sakit, aksidente, katalagman, gipatay o bunga na sa katigulangan**. Ang kamatayon dili mapugngan sa bisan unsa , **bitamina, medicina, paugnat sa kusog o saktong pagkaon, hinuon pwede kini mapataas niining mga butanga**. Ang tawo moagi gayod sa kamatayon, gawas kung maabtan siya sa pagbalik ni Kristo.

### UNSAY NAGHULAT SA PISIKAL NGA KAMATAYON?

“.....mamatay ang tagsa-tagsa sa makausa, ug tapos niana hukman siya sa Dios.”

Hebreo 9:27

- Ang **“paghukom sa Dios”** maoy mosunod human sa kamatayon. Ang matag kalag nga mopanaw niining kalibotana moatubang gayod sa Dios ug mohatag ug husay sa iyang kinabuhi.

### UNSA ANG PAGHUKOM?

“Ug nakita ko ang mga patay, inila ug dili inila, nga nagbarog atubangan sa trono. Gibukhad ang mga libro, ug may lain pa

gayong librong gibukhad nga mao ang libro sa kinabuhi. Gihukman ang mga patay sumala sa ilang binuhatan nga nahisulat sa mga libro. Ang tanan kansang ngalan wala mahisulat sa libro sa kinabuhi gitambog ngadto sa linaw nga kalayo.”

Gipadayag 20:12,15

- Ang **“PAGHUKOM”** mao ang panahon diin Dios mohimog desisyon kung iya bang pasudlon ang usa ka tawo o dili sa iyang Gingharian. Ang kamatayon usa ka pultahan ngadto sa laing lugar diin wala nay kahumanan (*eternity*). Adunay lay duha ka lugar nga pwede adtoan sa usa ka tawo nga namatay, langit o impyerno ( Lukas 16:19-23). kung ang Diyos magahukom kanimo ngadto sa “linaw nga kalayo,” didto ka ug kung siya mohukom kanimo ngadto sa “langit,” langit ka. Walay tunga-tunga.

### GIUNSA PAGHULAGWAY SA BIBILIA ANG IMPYERNO?

#### I. Usa kini ka lugar diin ang yawa uban iyang mga anghel ug tanang mga makakasala pagasilotan

“Unya moingon siya ngadto sa iyang wala, ‘Pahawa kamo kanako, kamong gipanghimaraot sa Dios! Ngadto kamo sa kalayo nga walay pagkapalong nga giandam alang sa Yawa ug sa iyang mga anghel!”

( MATEO 25: 41 )

- Ang tanang mga talawan, ang mga mabudhion, ang mga malaw-ayon, ang mga mamumuno, ang mga makighilawason, ang mga salamangkiro, ang mga nagsimba ug mga diosdios, ug ang tanang bakakon mahiagom gayod sa linaw nga kalayo

(Gipadayag 21:8). Mahulagway ba nimo, nga ang tanang demonyo ug ang tanang mga daotang tawo sa kalibotan imong makauban sa usa ka lugar hangtod sa kahangtoran? Mao kini ang mahitabo sa mga tawo nga mosupil sa Dios.

## **II. Usa kini ka lugar diin adunay grabe kayo nga pag-antos ug kasakit.**

- a. Adunay kini mga ulod nga dili mamatay ug kalayo nga dili mapalong . (MARCOS 9: 47-48)
- b. Didto ang grabe kayo paghilak ug panagkagot sa mga ngipon . (MATEO 25:30) .
- c. Didto mahinumdom kasa imong kinabuhi samtang didto pa sa Kalibutan . ( LUKAS 16:25).

- Didto makabasol ang mga makasasala pero dili na sila pwede makahinulsol. Makahinumdom sila sa mga panahon diin ilang giusik-usikan ang ilang kinabuhi sa pagpuyo sa sala. Manghilak sila ug magkagot ang ilang mga ngipon sa dihang iloang mahinumdom ang mga pagmaymay nga gikan sa ilang mga minahal sa kinabuhi nga unta moduol na sila sa Dios ug magbag-o. Dinhi matuman ang panultihon, **“walay pagbasol nga nag-una.”**

## **III. Usa kini ka lugar diin ang mga makakasala hagtod sa kahangturan pagsilotan ug mahimulag sa presensya sa Dios.**

“Mag-antos sila sa silot sa walay kataposang pagkalaglag ug ipahilayo sila sa presensiya sa Ginoo ug sa iyang mahimayaong gahom.”

( 2 TESALONICA 1:9 )

## **GIUNSA PAGHULAGWAY SA BIBLIA ANG LANGIT!**

**Usa kini ka lugar diin walay nay Paghilak, kasakit, kasub-anan ug kamatayon.**

“Pahiran niya ang ilang luha ug wala nay kamatayon ni kasubo, paghilak o kasakit, kay nahanaw na man ang daang mga butang.”  
(Gipadayag 21:4)

**Unsa kini ka lugar diin wala na’y daotan ug mga makasasala.**

“Apan walay bisan unsa nga hugaw makasulod sa siyudad o bisan kinsa nga naghimog makauulawng buhat o nagbakak. Ang pasudlon sa siyudad mao lamang ang mga tawo kansang ngalan nahisulat sa libro sa kinabuhi sa Nating Karnero”.  
(Gipadayag 21:27)

**Usa kini ka Lugar diin wala ang Dios makig-ubanna kanato sa kahangtoran.**

“Karon ang puloy-anan sa Dios ania sa Dios na sa katawhan. Magpuyo na siya tipon kanila ug sila mahimong iyang katawhan. Ang Diyos makig-uban kanila ug siya mahimo nga ilang Diyos.  
(Gipadayag 21:3)

## KANUS-A KITA MAG ANDAM NIINING KINABUHI NGA UMAABOT?

“Ang dato mitubag, ‘kon mao kana, Amahan, hangyoon ko ikaw nga imo untang ipadala si lazaro ngadto sa amo, diin ako may lima ka igsoong lalaki. Paadtoa siya aron sila kapasidan-an ug dili mahianhi niining dapit sa kasakitan.

(Lukas 16:27-28)

- Niini nga pasahe sa itaas mihangyo ang dato (namatay ug naadto sa impyerno o Hades) nga ipadala si Lazaro (patay na apan naadto sa langit) ngadto sa iyang lima ka igsoon aron kapasidan-an sila samtang buhi pa aron dili mahiadto niining lugar sa kasakitan. Nasayod siya nga nagpuyo usab sila sa sala sama kaniya ug kung dili sila moduol sa Dios ug magbag-o magiagom usab sila sa impyerno sama kaniya. Kanus-a ba kita mag-andam sa umaabot nga kinabuhi? **Karon, samtang buhi pa kita.** Ayaw na hulata ang ugma basin ug ulahi na kaayo ang tanan. Ang yawa gusto nga dili kita mutuo nga ang “Langit” ug “impyerno” tinuod aron dili kita mangandam niining kinabuhia.

## UNSAON NATO PAG-ANDAM NIINING KINABUHI NGA UMAABOT?

“Si Abraham miingon, atua didto si Moses ug ang mga Propeta nga magpasidaan kanila; sila nay mahibalo sa pagpamati sa

ilang isulti’. Ang dato mitubag, ‘Apan Amahan, kana dili igo! Kon adunay mabanhaw ug moadto kanila, mamiya gayod sila sa ialng mga sala.’ Apan miingon si Abraham, ‘Kon dili sila mamati kang Moises ug sa mga propeta, dili gayod sila makabig bisan pag may mabanhaw.’”

(Lukas 16:29-31)

- Makita nato sa itaas nga mga bersikulo ang tubag ni Abraham sa hangyo sa dato nga ipadala si Lazaro balik sa kalibotan aron pahimangnoan ang iyang lima ka igsoon nga lalaki. Gusto sa dato ng aduna gayoy mabanhaw gikan sa mga patay aron sila motuo ug mobia sa ilang mga sala. Apan giklaro nni Abraham sa dato nga aduna nay mga buhi nga alagad sa Dios nga nagawali sa mensahe sa Gingharian ngadto kanila ug kung dili sila maminaw wala nay mahimo aron pagluwas kanila. Unsaon nato pag-andam sa kinabuhi nga umaabot? **“Kinahanglan maminaw kita sa nga gigamit sa Dios aron pagpahimangno kanato ginamit ang iyang Pulong nga mao ang Biblia.”**

Ang umaabot nga mga pagtulon-an magtudlo kanato unsaon nga masiguro gayod nato ang kaluwasan. Busa ayaw pakyasa ang paghuman niini nga mga leksiyon aron maandam gayod kita sa ‘kinabuhi nga umaabot’ ug ‘masangkap aron pagtabang sa mga wala pa naluwas.’ **Karon ang pag-andam sa atong kaugalingon dili ugma kung patay na kita!**

## PAG-APLIKAR SA KAUGALINGON

- ❖ Duna ka bay kahadlok nga moadto sa impyerno? Ngano man?
- ❖ Sigurado ka ba nga mo adto ka sa langit kung galling kuhaon ka na sa Ginoo? Ngano man?

## KALUWASAN (Salvation Series: Lesson 2)

"Mao usab ang mahitungod kaninyo: sa pagkadungog ninyo sa matuod nga mensahe sa **Maayong Balita nga naghatag kaninyog kaluwasan**, mituo kamo kang Kristo. Busa gipatikan kamo sa Dios pinaagi sa paghatag kaninyo sa Espiritu Santo nga iyang gisaad, timaan nga kamo iya na."

Efeso 1:13

Ang bersikulo nga atong gibasa nagsulti nga una kita makabaton ug "kaluwasan" kinahanglan ato usang madunggan ug tuohan ang mensahe sa Maayong Balita. Ang pasahe nagsulti kung atong dawaton ang mensahe sa kaluwasan nga mao si **Kristo** mapatikan kita sa **Espiritu Santo** timaan nga kita ya na sa Dios. Apan *nganong kinahanglan man gayod kita maluwas? Unsa bay sayop kanato? Nganong motuo man gayod kita kang Kristo aron maluwas? Ato kining tubagon.*

"...ang inyo hinuong kalapasan maoy nag-ulang kaninyo ug sa inyong Dios, ang inyong sala maoy hinungdari sa iyang pagkahilayo kaninyo aron dili siya makadungog kaninyo."

Isaias 59:2



## ADUNAY BABAG NGA NAGSEPARAR SA DIOS UG SA TAWO

Imo bang nabati nga Dios murag layo kayo sa imong kinabuhi ? kitang tanan gibati ug sama niini. Ang pagbati nga ang Dios layo kayo gibati sa tanan, tungod niini daghan ang nagtuo nga pinaagi sa relihiyon ug sa mga maayong buhat sila maduol sa Dios. Peru tungod kay ang atong pagkaseparar sa Dios dili Pisikal. **Walay tawhanong binuhatan ang makapaduol kanato ngadto kaniya.** Unsay hinungdannga ang tawo nahimulag sa Dios.

**“Ang inyo hinuonng kalapasan** maoy nag-ulang kaninyo ug sa inyong Dios; **ang inyong sala** maoy hinungdan sa iyang pagkahilayo kaninyo aron dili siya makadungog kaninyo.”

ISAIAH 59:2

## ANG SALA MAOY NAGPAHIMULAG SA TAWO GIKAN SA DIOS

Ang pagseparar sa Dios ug sa tawo klaro kayo sa Biblia balaan; ang tawo makakasala. Ang Dios mayo; ang tawo daotan. Nag ingon ang pulong sa Dios nga **“Nakasala ang tanan ug nahilayo sa Dios”** ( Rom. 3:23 ). Kamatayon o pagkagimulag sa presensiya sa Dios ang bayad sa sala ( Roma 6:23 ).

## ANG HUSTISYA SA DIOS NAGKINAHANGLAN UG SAKRIPISYO ALANG SA SALA

Tungod ka yang Dios ‘ matarong ug hustisya ‘ dili niya matugotan ang sala nga dili masilotan. Tungod kay siya ‘ mahigugmaon ug manggiluluy-on’, dili niya gusto nga ang tanang tawo mahimulag kaniya. Ang langitnon nga pagsulbad sa maong problema mao nga si Kristo- Jesus, ang Bugtong Anak sa Dios maoy mahimong “

sakripisyo para sa tanang sala sa tibuok kalibotan”. Nag-ingon ang Hebreo 9:28, ***“Gihalad usab si Kristo sa makausa aron pagwagtang sa mga sala sa daghang mga tawo.”*** Siya ang ***“..nating karnero sa Dios nga nagwagtang sa sala sa Kalibotan”*** ( Juan 1:19 ). Ang Biblia nagsulti nga:

*“ Gihatag siya sa Dios aron pinaagi sa iyang kamatayon mapasaylo ang mga sala sa mutuo kaniya. Niining paagiha gipakita sa Dios ang iyang hustisya bahin sa mga sala... aron pagpakita nga siya matarong ug himuon niyang matarong ang tanan nga motuo kang Jesus.*  
**Roma 3:25-26**

## SI JESUS ANG MIBAYAD SA SILOT SA ATONG MGA SALA

Unsay nahitabo didto sa krus ? Si Jesus mipuli sa atong dapit ug sa atong silot. Adunay panagkambiyo nga nahitabo didto sa krus. Iyang giangkong ang atong tunglo ug kapobrehon aron makadawat kiota sa iyang panalangin ug kadato. (Galacia 3:13-14 ; 2 Corinto 8:9). Iyang giangkong atong mga sala aron makaambit kita sa iyang pagkamatarong ( 2 Corinto 5:21 ). Tungod sa iyang kinabuhi nga walay sala, siya lang ang angayan nga mobayad sa silot sa sala sa tawo ug mopatunga sa Dios ug sa Tawo. **Tungod niini ang atong kaluwasan nabasi sa gibuhay ni Jesus didto sa krus ug dili unsay atong nabuhay para kaniya.** Si Jesus lang ang nagbayad sa silot sa atong mga sala. Ang **2 Corinto 5:21** nagsulti nga *“ Walay sala si Kristo, apan gipaambit siya sa Dios sa atong mga sala aron kita, sa atong pagpakiusa kaniya makaambit sa pagkamarong sa Dios.*

## MALUWAS KITA KUNG TALIKDAN ANG SALA UG MOSALIG KANG KRISTO

Kitang tanan nakasala batok sa balaan ug matarong nga Dios. Ang bayad sa sala mao ang pagkahimulag sa *“buhi nga presensiya sa Dios”* ug ang pagsilot ngadto sa *“impiyerno.”* Ang Dios ‘hustisya’ ug mosilot gayod sa Sala. Siya usab ‘mahigugmaon’ ug dili gusto nga kita mahimulag kaniya ug moadto sa impiyerno hangtod sa kahangtoran. Mao nga yang gipadala ang iyang bugtong Anak nga si Jesu- Kristo para pagbayad sa silot sa atong mga sala didto sa krus (Rormia 5:8). Tungod sa iyang kinabuhi nga walay sala ang kamatayon wala makapugong kaniya. Nabanhaw siya gikan sa mga minatay sa ikatulo ka adlaw. **Buhi si Jesus!**

Ania siya karon ug andam mohatag ug kapasayloan niadtong andam maghinulsol sa ilang mga sala. Andam siya moluwas niadtong motugyan sa ilang mga kinabuhi ngadto kaniya. Ang mensahi sa maayong balita mao nga, ***“dinha ni kristo dunay kaluwasan gikan sa sala ug pagpasig-uli ngadto sa Dios”*** (2 Corinto 5:19). Madawat nato ang kaluwasan kon moundang kita pagsalig sa atong kaugalingon ug atong ibutang ang atong pagsalig sa gibuhay ni kristo didto sa krus para kanato. Nag-ingun ang Biblia sa Roma 10: 19-10:

*“Maluwas ka kon ipahayag mo nga si Jesus mao ang Ginoo, ug sa kasingkasing motuo ka nga gibanhaw siya sa Dios. Kay mitou man kita sa kinakasingkasing gayod, gimatarong kita sa Dios; ug naluwas kita kay gipahayag man nato kini”.*

## PAG-APLIKAR SA KAUGALINGON

- Andam ka na bang mobiya sa sala ug motugyan sa imong kasingkasing ngadto kang Jesus?
- Andam ka ba mosunod ug motuman kaniya sa tibouk nimong kinabuhi?
- Andam ka na bang mag-ampo para madawat nimo ang kapasayloan ug kaluwasan?

## PAG-AMPO PARA SA KALUWASAN

Ginoong Jesus, nagadoul ako kanimo uban sa pagtou nga ikaw ang gipadala sa amahan aron pagbayad sa silot sa akong mga sala. Mitou ako sa imong gibuhay didto sa krus..mitou usab ako nga nabanhaw ka gikan sa minatay...buhi ka..ako kang dawaton karon, isip Ginoo ug manluluwas sa akong kinabuhi..Ginoo, akong giangkong nga ako us ka makasasala...pasayloa ako...hinloi ako...ginoong Jesus, sulod sa akong kasingkasing pinaagi sa imong espiritu...puy-I ako...sugod karun ikaw na ang akong tumanon ug alagaran...moundang na ako sa pagpakasala... Ginoo, isulat ang akong pangalan sa libro sa kinabuhi. Salamat Ginoong Jesus..nga dinha kanimo ako luwas na...dinha kanimo ako napasaylo na...dinha kanimo ako anak na sa Dios ug ang Dios ako nang Amahan...dinha kanimo ako taga langit na ug walay nay labot sa impiyerno.**AMEN**

## **USA LANG KA DALAN**

**(Salvation Series: Lesson 3)**

Nakadungog kita niining panultihon nga, “daghan ang dalan paingon sa langit pero mosangko ra gihapon kini ngadto sa usa ka Dios”. Ang uban mosulti nga, “Usa ra ka Dios ang atong ginasimba pero lainlain lang ang mga pamaagi sa atong pagdoul ngadto kaniya”. Sibong ba kini nga pagtulon-an sa Biblia? Atong tan-awon unsay ginasulti sa pulong sa Dios

Magitungod nini.

### **1. SI JESUS LANG ANG ‘DALAN’ PADULONG SA AMAHAN NGA LANGITNON.**

‘Si Jesus mitubag, “ako ang dalan, ang kamatuoran, ug ang kinabuhi; walay makaadto sa Amahan kon dili moagi kanako”. (John 14:6)

### **2. SI JESUS LANG ANG “TIGPATUNGA” TALIWALA SA DIOS UG SA TAWO.**

“kay may usa lamang ka Dios ug usa lamang ang naghiusa sa Dios ug sa mga tawo, ang tawo nga si kristo Jesus, nga mitugyan sa iyang kaugalingon aron pagluwas sa tanang tawo. Kini ang kamatuoran nga luwason sa Dios ang tanang mga tawo sa gitagal nga panahon”.

(1 Tim 2:5).

### **3. SI JESUS ANG ‘PULTAHAN’ DIIN ANG MGA TAWO MAKASULOD UG MALUWAS.**

“ako ang pultahan; ang musolod agi kanako maluwas; mosulod siya ug mogula ug makakaplag siya ug masibsib”.

(John 10:9).

### **4. ANG “PANGALANG JESUS” LANG MAOY GIHATAG SA DIOS ARON ANG TANANG TAWO MALUWAS.**

“ ang kaluwasan makaplagan lamang diha kaniya, kay wala nay laing ngalan sa tibouk kalibotan nga gihatag sa Dios ngadto sa katawhan nga mulowas kanato”.

### **5. SI JESUS LANG ‘ANG GIPADALA SA AMAHAN’ ARON ANG TANANG TAWO MAKABATON UG KINABUHING WALAY KATAPOSAN.**

“kay gihigugma pag-ayo sa Dios ang kalibotan ug tungod niini gihatag niya ang iyang bugtong anak, aron ang tanang nga motuo kaniya dili mamatay, kondili makabaton hinoun sa kinabuhing dayon”.

(John 3:16)

- Ang Biblia nagtudlo nga si Jesus lang ang dalan, pultahan ug tulay paingon sa amahan. Walay makaadto ug mahiusa sa Dios gawas kon moagi kaniya. **Walay kaluwasan gawas kang Jesus-kristo!** Siya lang ang nagpakamatay sa krus para maluwas ang tanang tawo sa kalibotan. Dili tinoud nga daghan ug dalan paingon sa Dios. Usa lang ang dalan, si **Jesus**. Bug-at kini nga pagtulon-an pero mao kini ang kamaturan nga ginatudlo sa Biblia.

## LIMA KA LAKANG ARON MAKABATON KA UG KALUWASAN

### 1. ANGKONA NGA IKAW US AKA MAKASASALA (PAGPAUBOS).

“kon moingun kita nga wala kitay sala, gilimbongan nato ang atung kaugalingon ug wala kanato ang kamatuoran. Kon moingon kita nga wala makasala, gipakabakakon nato ang Dios ug wala nato dawata ang iyang pulong”.

1 Juan 1:8,10

### 2. PANGAYO UG PASAYLO SA IMONG MGA SALA NGADTU SA DIOS (PAGKOMPISAL).

“apan kung isugid nato sa Dios ang atung mga sala, tumanon niya ang iyang saad ug buhaton ang matarong ug mopasaylo gayod sa tanan tang mga sala ug maghinlo sa tanan tang mga kalapasan.

1 Juan 1:9

### 3. ISALIKWAY ANG IMONG MGA SALA (PAGHINULSOL).

“pabiyaa ang mga daotan sa ilang mga sala ug ipasalikway sa mga makasala ang ilang datoang mga hunahuna. Pabalika sa Ginoo aron kaloy-an sila, pabalika sa atong Dios, kay andam siya sa pagpasaylo”.

### 4. TUOHI NGA ANG DIOS MOLUWAS KANIMO PINAAGI SA IYANG GRASYA (PAGTOU).

“kay nagpadayag ang Dios sa iyang grasya alang sa kaluwasan sa tanang mga tawo”.

Tito 2:11

- Ang pagbasabot sa **“grasya”** mao nga *“nakadwat kita ug pabor nga dili angayan moabot kanato”*. Kamatayon ang angay kanato tungod sa atong mga sala apan ang Dios naghatag kanto ug libre nga gasa sa kaluwasan diha ni kristo Jesus. Atong nadawat ang kabaliktaran sa atong angay madawat. Mao kini nga ang grasya! Ang kaluwasan naggikan sa Dios ug wala naggikan sa tawo. Nag-ingun ang Biblia, **“naluwas kamo tungod sa grasya sa Dios”** (Efeso 2:5). kinahanglan tuohan ta kini nga pamaagi kanato nga mga makasasala.

### 5. DAWATA SI KRISTO NGA GINOO NGANHA SA IMONG KASINGKASING (PAGTUYAN).

“Sanglit gidawat na man ninyo nga Ginoo si Kristo Jesus, pagkinabuhi kamo nga hiniusa kaniya”

Colosas 2:6

- Kinahanglan dawaton nato si Jesu-kristo nga atong Ginoo ug manluluwas sulod sa atong kasingkasing. Unsa kita makalakaw uban kaniya kinahanglan ato usa siyang papuy-on sa atong mga kinabuhi. Mosulod si kristo pinaagi sa iyang balaang Espirito kung ato siyang imbitaron pinaagi sa pag-ampo uban sa pagtuo. **“Mao kini ang takna sa pagdawat sa kaluoy sa Dios; karon mao ang adlaw sa kaluwasan!”** (2 Corinto 6:2).

## **PAG-APLIKAR SA KAUGALINGON**

- Andam ka na ba mutogyan sa imong kinuhi ngadto kaniya?
- Andam ka anaba maghinulsol ug modawat sa iyang grasya? Sa iyang libre nga kaluwasan?

## **MGA PANGUTANA MAHITUNGOD SA KALUWASAN**

**(Salvation Series: Lesson 4)**

### **1. Unsay atong gipasabot kung mosulti kita nga “luwas na kita”?**

Tungod sa atong pagkahiusa kang kristo...

- i. Napasaylo na ang atong mga sala (Colosas 1:13-14) ug nakabaton na kita sa pagkamatarong nga gikan sa Dios (2 Corinto 5:21; Roma 3:22).
  - ii. Naluwas na kita gikan sa ikaduhang kamatayon nga mao ang impyerno ug duna nay kasigurohan sa langit (Gipadayag 21:8; Juan 11:25-6; Filipos 3:20).
  - iii. Naluwas na kita sa “makasasala nga kinaiya” ug nakabaton na sa “kinaiyahan sa Dios” (1 Juan 3:9; 2 Pedro 1:3-4). bag-o na kitang mga binuhat (2 Corinto 5:17).
  - iv. Naluwas na kita gikan sa kaulipnan ni Satanas ug parte na sa Gingharian ni Kristo (Colosas 1:13. Nahiusa na kita sa Dios nga atong Amahan (Juan 14:6; 1 Juan 2:23).
- Tungod sa sala nahimulag kita sa Dios apan dinha kang Kristo nakabaton na kita ug kapasayloan ug nahiusa na pag-usab Kaniya. Ang katuyoan sa Kaluwasan dili lang para malikay kita sa ‘tunglo karon’ ug sa ‘silot sa impyerno ugma’ apan ang pagbalik sa atong maayong relasyon ngadto sa Amahan karon (2 Corinto 5:18-19).

## 2. Makaluwas ba kanato ang atong mga maayong binuhatan?

“kay pinaagi sa pagtuo naluwas kamo tungod sa grasya sa Dios. Dili kini inyong buhat kondili gasa sa Dios. Busa walay makapasigarbo niini sanglit dili man kini bunga sa inyong mga paningkamot.’

Efeso 2:8-9

- Adunay duha ka rason nganong dili makaluwas ang atong mga maayong binuhatan:
  - i. Ang kaluwasan gasa sa *Dios* ug madawat lang kini pinaagi sa pagtuo kang Ginoong Jesus ug dili pinaagi sa maayong binuhatan. (basaha usab ang Tito 3:4-5)
  - ii. Aron *walay magpasigarbo* atubangan sa Dios ug sa bisan kinsa nga naluwas siya pinaagi sa iyang kaugalingong mga paningkamot. Si Jesus lang ang manluluwas.
- Sa wala pa kita maluwas ang atong maayong binuhatan mora lang ug “*hugawng pahiran*” atubangan sa Dios (Isaias 64:6). bisag unsa pay atong buhaton nga maayo makasasala pa gihapon kita. Walay makasasala nga makatangtang sa iyang mga sala bisan ug mabuhay pa siya ug mga maayong binuhatan. Ulipon siya sa iyang mga sala (Juan 8:34).
- Si Kristo lang ang makaluwas kanato gikan sa sala (Mateo 1:21). Human kita maluwas, ang mga maayong binuhatan nga bunga sa Espiritu Santo ang kinahanglan makita nganhi kanato (Efeso 2:8-10; Galacia 5:22-23). Kini nga mga maayong binuhatan dili na *hugaw nga trapohan* atubangan

sa Dios kondili humot na nga mga halad nga makapahimuot kaniya (Hebreo 13:16)

## 3. Sa unsa nga paagi maluwas ang usa ka tawo?

Ang tinugyanan sa karsel nagutana kang Pablo ug Silas “**Sir, unsa may akong buhaton aron ako maluwas?**” Sila mitubag, “**Tuo kang Ginoong Jesus, ug maluwas ka....**”

Buhat 16:30-31a

- Tuo kang Ginoong Jesus ug maluwas ka! Mao kini ang paagi aron maluwas ang usa ka tawo. Unsway pasabot sa “pagtuo kang Ginoong Jesus”?
- Kini nga klase sa pagtuo dili sa hunahuna lang kondili kini nga pagtuo naglangkob ug “*pagtugyan*.” Nalambigit dinhi ang pagdumili sa iyang kaugalingon ug pagdawat sa pagka Ginoo ni Jesu-Kristo (Galacia 2:20). Ang “makaluwas ng pagtuo” naglangkob ug tinuod nga ‘pagsalig’ ug ‘pag-ila’ nga si Jesus na ang matuman sa iyang kinabuhi hangtod sa kahangtoran. Kini nga klase sa pagtuo nasulat sa 2 Corinto 5:15:

“*Namatay siya alang sa tanang mga tawo aron ang mga buhi dili na magkinabuhi alang sa ilang kaugalingon, kon dili kaniya nga namatay ug gibanhaw tungod kanila.*”
- Kung imong itugyan ang imong kinabuhi ngadto kang Kristo ug magkinabuhi na uban kaniya ug dili na sa imong kaugalingon maluwas ka (Filipos 1:21; Mateo 16:24-26). Maluwas ka kung imong dawaton si Kristo nga imong Ginoo (Roma 10:9-10).

#### 4. Kanus-a man dapat maluwas ang usa ka tawo?

- Karon samtang buhi pa kita, dili ugma, dili kung patay na kita o kung atua na kita sa langit. Ang Biblia nagsulti nga, ***“Mao na kini ang takna sa pagdawat sa kaluoy sa Dios;karon mao ang adlaw sa kaluwasan!”*** (2 Corinto 6:2). Dili na kita magbuhat ug ugma kay basin ulahi na ang tanan. Ang Diyos nagtawag kanato karon, busa karon kita miduol kaniya. Dili na kita maghulat sa adlaw sa paghukom. Itugyan ang imong kinabuhi kang Jesus kay karon ang adlaw sa imong kaluwasan!

#### 5. Unsay pasabot nga “gasa” sa kaluwasan o kinabuhing walay kataposan?

“...apan ang gasa sa Dios mao ang kinabuhing walay kataposan nga anaa kang Kristo Jesus nga atong Ginoo.”

Kung mosulti kita nga gasa ang usa ka butang adunay tulo nga nagalangkob niini”

- i. Kung gasa ngapasabot nga duna gayoy naghatag niini.
  - ii. Kung gasa nagpasabot nga libre kini ug walay bayad.
  - iii. Kung gasa kinahanglan dawaton gayod kini sa gigasahan aron kini madawat ug mapuslan.
- Ang pinakadako nga gasa sa Dios nganhi kanato mao si **Ginoong Jesus** ug diha kaniya makabaton kita ug kinabuhi nga walay kataposan. Si Kristo ang gasa sa Dios nganhi kanato nga mga makasasala. Kinahanglan ato siyang dawaton karon isip GINOO aron maluwas kita ug malipay ang naghatag nga mao ang Dios Amahan.

#### PAG-APLIKAR NGA PANGUTAN:

- ◆ Unsay mga nakatandog kanato sa atong leksiyon? Ngano man? (paghatag ug tulo)
- ◆ Aduna ba kitay mga pangutana mahitungod sa kaluwasan? Unsa man?
- ◆ Nakadawat na ba kita sa libre nga kaluwasan sa Dios dinha ni Kristo? Kung wala pa andam ka ba modawat niini karon?

## **KALUWASAN: MAWALA BA O DILI NA?**

(Salvation Series: Lesson 5)

Ang bayad sa sala mao ang kamtayon apan ang gasa sa Dios mao ang kinabuhi nga walay katapusan diha kang Kristo (Roma 6:23). Dinha kang Jesus nasig-uli na kita sa Amahan.

### **DUHA KA SAYOP NGA PAGTULON-AN MAHITUNGOD SA KALUWASAN**

#### **i. Ang kaluwasan nga imong nadawat gikan sa Dios dali kayo mawala.**

- Luwas ka karon tungod sa imong pagtuo kang Jesus apan kung makasala ka ugma kini nga kaluwasan mawala dayon. Busa kinahanglan ka na usab modawat kang Ginoong Jesus aron mobalik kini nga kaluwasan diha kanimo. Kini nga pagtulon-an sayop.

#### **ii. Ang kaluwasan nga imong nadawat gikan sa Dios dili na gyud mawala.**

- Nagtudlo kini nga kung luwas ka na luwas ka na gayod hangtod sa kahangturan bisan ug mobalik ka sa imong karaang kinabuhi sa pagpakasala (backslide). Sayop gihapon kini pagtulon-an.

### **ANG SAKTO UG BALANSE NGA PAGTULON-AN ANAA SA TUNGATUNGA SA DUHA**

1. Kung luwas ka na “dili dali mawala” ang imong kaluwasan nga nabatonan.

Kung kita mga anak na sa Dios dili dayon mawala ang atong pagka-anak sa Dios. Sa dihang makasala kita Maputol ang atong pakigdait (fellowship) sa Dios apan dali dayon maputol ang atong relasyon (relationship) kaniya. **Adunay duha ka rason nganung magpaksala pa ang usa ka kristohanon.**

- I. Luwas na pero bata pa nga kristohanon (1 Corinto 3:1-4).
- II. Luwas na ug miagi na ug paghamtong pero mitalikod sa Dios ug mibalik sa iyang karaang binuhatan (Pedro 2:20-22). Gitawag kini ug “Backslider”. (Ezequiel 18:24-26)

Kadaghanan sa mga sala nga atong nabuhat human kita naluwas bunga sa atong pagka-bata pa dinha sa Ginoo ug dili tungod kay nagrebelde kita kaniya. Kadaghanan sa mga kristohanon mga bata pa sa Ginoo mao ang ilang mga kinabuhi ug kinaiya mora pa gihapon ug mga tawo nga anaa sa kalibotan. **Duha ka rason nganong mga bata pa sila diha sa Ginoo:**

#### **I. Wala sila maatiman sa usa ka espirituhanon nga amahan.**

- Aron sakto ang atung pagtubo kinahangalan kita mosabmitar ngato sa usa ka “espirituhanon nga amahan” aron kita maatian ug masangkap (2 Timoteo 2:2; 1 Corinto 4:14-17).

#### **II. Wala sila magbaton ug pagdisiplina sa ilang kaugalingon.**

- Aron kita motbo kinanglan kita moampo, mobasa sa Biblia, mosimba, magbalaan, moalagad ug



moapil sa mga panagtigom. Kini nagkinahanglan ug “pagdisiplina sa Kaugalingon”.

Hebreo 10:26-27

Ang Dios determinado kaayo nga motapos unsay iyang gisugdan sa atong kinabuhi (Filipos 1:6). Bisan pa ug motalikod kita kaniya (backslide) siya dili gihapon mounding pagpangita ug paagi aron ta mabalik ngadto kaniya. **Kung mobalik kita sa pagpakasala ang Dios...**

- a) Magpdala ug mga tawo nga modasig, momaymay, ug mobadlong kanato (2 Samuel 12:1-14).
- b) Mobisita kanato pinaagi sa mga damgo, panan-awon ug sa iyang presensiya.
- c) Magpadala ug bagyo (problema) pagpahigmata kanato (Jonas 1:4-15).
- d) Modisiplina kanato aron mobalik kita ngadto kaniya (Hebrew 12:5-11).

Kominado ang amahan nga mobuhat sa iyang parte aron matuman ang iyang plano nganhi sa atong kinabuhi (Juan 10:29). Buhaton usab nato ang atung parte pinaagi sa **“pagtuman kaniya”**.

## **2. ANG KALUWASAN NGA IMONG NADAWAT “ADUAY POSIBILIDAD NGA MAWALA”.**

“kay wala nay bisan unsang sakripisyo nga makawagtang sa mga sala **kon tuyoon gayud nato ang pagpaksala human ipahibalo kanato ang kamatuoran**. Hinunoa, kahadlokan nato ang mahitabo unya: ang Paghukom ug ang mabangis nga kalayo nga molaglag sa misukol sa Dios!”

Tinoud luwas na kita dinha ni kristo pero ang mga bersikulo sa itaas nagsulti nga pwede mawala ang atong kaluwasan kung mobalik kita sa pagpakasala (tinuyo nga pagputo sa sala). **Niini, ang Dios ang makahukom kung kanus-a niya taktakon ang us aka rebelled sa iyang pamilya**. Nag-ingon ang Biblia sa Hebreo 10:29 nga silutan sa Dios ang magtutuo nga mobalik pagpuyo sa pagpakasala tungod sa tulo ka butang nga iyang nahimo:

- i. Iyang natamay ug giyatakyatakan ang anak sa Dios nga naluwas kaniya.
- ii. Iyang gipakawalay bili ang dugo nga nahinlo kaniya gikan sa tanang sala.
- iii. Iyang nabugalbugalan ang balaang Espiritu nga nagpuyo kaniya.

## **MGA BERSIKULO SA BIBLIA DIIN PUWEDE MAWALA ANG ATONG KALUWASAN**

- Ang Gipadayag 3:4-5 nagsulti nga pwede matangtang ang atong pangalan sa libro sa kinabuhi kung kita dili magpuyo nga madaogon batok sa sala.
- Ang Mateo 24:9-13 naghigot nga sa kataposang mga adlaw ‘adunay nga magtutuo nga mobiya sa Ginoo’ tungod sa kagubot ug sa pag-uswag sa sala sa kalibotan.
- Si Ginoong Jesus nagtudlo ug tulo ka parabola sa tibouk kapitulo sa Mateo 25 nga naghigot sa mga matutuo nga nangalaglag tungod sa ilang sala **“walay pagpakabana”**.

Wala silay gibuhat bisan ug nasayod na sila unsay dapat nila buhaton. Ang dili pagbuhat unsay iyang nasabtan nga dapat buhaton usa ka dako nga sala atubangan sa Dios (Santiago 4:17).

- Ang sanga nga anaa na sa punoan pero dili mamunga putlon (Juan 15:1-2). Dili igo na mabutang kita sa punoan “kinahanglan magpabilin kita aron mamunga” ug dili maputol (Juan 15:5-6). 17.
- Si Apostol Pablo nagsulat sa Iglesia sa Galacia ug sa Roma nga, **kinahanglan magkinabuhi sila sa Espiritu Santo ug dili sa makasasala nga kinaiya aron masiguro nila ang kinbuhi nga walay kataposan** (Galacia 5:16-21,6:7-8; Roma 8:13).
- Si Apostol Pablo midisiplina sa iyang unod (tawhanong kinaiya) kay basin ug ang iyang giwalihan malangit ug siya dili ( 1 Corinto 9:27).

#### **KARON NGA LUWAS NA KITA UNSAY ATONG BUHATON KUNG MAKASALA KITA?**

- Dili plano sa Amahan nga makasala kita, apan kon kita makasala moduol kita kaniya pinaagi kang **Jesus** nga atong manlalaban (1 Juan 2:1). Uban sa mahinulsolon nga kasingkasing atong isugid ang atong mga sala aron kita mapasaylo ug mahinloan (1 Juan 1:9). Dili gidayon mawala ang atong ‘kaluwasan’ kung kita makasala, apan ayaw pagbaya, kung adunay sala nga ginapakita sa **Espiritu Santo** hinulsoli gidayon kini. Ayaw pagpapuyo ug sala sa imong kasingkasing (Roma 6:12-14). Ayaw hugawi ang temple sa Dios (1 Corinto 3:16-17).

#### **PAG-APLIKAR NGA MGA PANGUTANA:**

- Andam ba kita mosabmitar sa Dios aron kita makapamunga sibo sa iyang gusto ug plano?
- Unsay atong buhaton aron dili makasinati ug “backslide”? (share)

## TULO KA ASPETO SA KALUWASAN

(Salvation Series: Lesson 6)

Kadaghanan kanato tungod sa atong kakulang ug kahibalo sa Biblia nagtuo nga ang kaluwasan masiguro lang kung atua na kita sa langit. Kini nga panghunana anaa sa Biblia pero usa lang kini sa tulo ka aspeto sa kaluwasan nga ginahisgutan sa pulong sa Dios. Atong hisgutan karon ang tulo ka aspeto sa kaluwasan nga ginatudlo sa Biblia.

### 1. GIMATARONG (Justification)

- Sumala sa kasulatan *“Wala gayoy mga tawo nga matarong...”* (Roma 3:10); *“Nakasala ang tanan ug nahilayo sa Dios”* (Roma 3:23). Ang makasasala dili gyud makamatarong sa iyang kaugalingon. Nag-ingon ang Biblia nga dili pinaagi sa atung mga relihiyoso ug mga maayong buhat mamatarong ang tawo. Misulat si Aposol Pablo sa Roma 10:2-4

“Kay saksi ako nga mainiton kaayo sila sa pag-alagad sa Dios. Apan ang ilang pag-alagad wala magsukad sa matoud nga kahibalo, kay wala man sila masayod sa paagi sa Dios sa pagmatarong sa tawo. Gigamit hinuon nila ang ilang kaugalingong paagi, ug busa wala sila mosunod sa paagi sa Dios pagmatarong sa tawo. Kay si kristo mao nga ang kataposan sa Balaod, aron ang tawo himoong matarong sa Dios pinaagi sa pagtuo”.

- Ang paagi sa Dios pagmatarong kanato diha lang sa atong pagtuo kang kristo ug dili tungod sa atong mga

paningkamot pagbuhat ug maayo. Ang pagkamatarong gasa sa Dios nganhi kanato dinha ni kristo Jesus ug ato kining madawat pinaagi sa pagtuo.

“Gihimong matarong sa Dios ang mga tawo pinaagi sa ilang pagtuo kang Jesu-kristo. Gibuhat kini sa Dios sa tanan nga nagtuo kang kristo...”

Roma 3:22

Sanglit gihimo na man kita matarong sa Dios pinaagi sa pagtuo, may panagdait na kita ug ang Dios sa pinaagi sa atong Ginoong Jesu-Kristo.”

Roma 5:1

- Kini ang unang aspeto sa kaluwasan. Nakadawat kita ug kapasayloan sa atong mga sala ug pagkamatarong sa Dios tungod sa atong pagkahiusa diha ni kristo (2 Corinto 5:19-21). Mga **“bag-o na kitang binuhat”** dinha ni kristo (2 Corinto 5:17). Kini nga aspeto sa kaluwasan “dihadiha” (instantaneous). Sa dihang atong gidawat si Jesus nganhi sa atong kasing-kasing dihadiha napasaylo kita, naluwas kita, nakadawat ug kinabuhi nga dayon ,nakadawat ug pagkamatarong gikan sa Dios, ug nahiusa sa Dios. 100% luwas na kita tungod sa atong pagtuo kang Jesus.

## 2 .GINABAG-O ( Sanctification)

- Human saimong “*kaluwasan*” dunay proseso sa “kabag-ohan” nga mosunod. Gitawag kini sa English ug “Sanctification Process”. ***Usa kini ka proseso sa kausaban gikan sa sulod ngadto sa gawas.*** Kini nga panghitabo dili “*dihadiha*” kondili “*hinayhinay*”. Ang kaluwasan dihiha (instantaneous) pero ang kabag-ohan hinayhinay (gradual). Tinuod naluwas kita gikan sa *panulondon* nga sala, sa yawa ug sa *impyerno* pero kinahanglan maluwas pa kita gikan sa mga binuhatan, mga sinultihan, mga hunahuna ug mga motibo nga daotan.
- Human kita naluwas gikan sa “*gahom sa sala*” (panulondon nga sala gikan kang adan) kinahanglan maluwas kita sa “*mga galamay sa sala*” (mga kinaiyahan nga daotan bunga sa atong karaang panghunahuna). (Dali lang ang pagawas sa Ehepto “Egypt” apan dili dali ipagawas ang mga pagtulon-an sa Ehepto gikan sa atung mga kinabuhì). Kining ika duhang aspeto sa kaluwasan mao ang ‘paghingpit sa atong kaluwasan’. Nag-ingon ang FILIPOS 2:13.” ***Padayon kamo pagpaningkamot uban sa kahadlok ug pagtahod aron sa paghingpit sa inyong kaluwasan...***” Luwas na kita pero kinahanglan kita mohamtong sa kinaiya, kahibalo ug katakos sa pagpangalagad.
- Nagpasabot usab kini nga human nato gidawat si Jesu-kristo nga Ginoo kinahanglan mopadayun kita pagpalalom ug pagpalig-on sa atong relasyon kaniya. Nag-ingon ang Colosas 2:6-7, “*Sanglit gidawat na man ninyo nga Ginoo si Kristo jesus, pagkinabuhì kamo nga hiniusa kaniya. Ipatidlom pag-ayo diha kaniya, ang inyong mga gamot, ug ipabarog ang inyong kinabuhì diha*

*kaniya, ug lig-ona ang inyong pagtuo sumala sa gitudlo kaninyo...*”

## 3. PAGABAYAWON ( Glorification)

- Ang ika-tulong aspeto sa kaluwasan mao ang kaluwasan sa atong lawas nga madunoton u gang kompleto nga kalaglagan sa kamatayon (1 Corinto 15:51-55). Kini mahitabo sa ika-duhang pagbalik ni Jesus diin iyang kitang kuhaon aron makig-uban na kaniya hangtod sa kahangtoran. Nasulat kini ni Apostol Pablo sa Filipos 3:20-21,

‘Apan kita mga lumulupyo sa langit, ug mahinangon kitang nagpaabot sa pag-anhi sa atong manunubos gikan sa langit – ang Ginoong Jesu-kristo. Ilisan niya ang ataong mga lawas nga may kamatayon sa lawas nga mahimayaon sama sa iyaha pinaagi sa gahom nga gigamit niya sa pagmando sa tanan”.

- Ang mauban sa pagbalik ni kristo kadto lang anaa na kaniya, patay man o buhi. Ang 1 tesalonica 4:16-17 nag-ingon:

“Unya mabati ang singgit sa pagmando ug ang tingog sa arkanghel ingom man ang lanog sa trumpeta sa Dios, ug mokunsad ang Ginoo gikan sa langit. Maoy unang mabanhaw kadtong nangamatay nga nagtuo kang kristo. Unya kita nga buhi pa niadtong adlaw, bawayon uban kanila didto sa mga panganod aron pagsugat sa Ginoo ug kita unya uban na kanunay sa Ginoo”.

- Kita nga naluwas na ug namtarong na diha ni kristo kinahanglan magpabilin nga putli aron makauban kita sa iyang ika-duhang pagbalik (Tito 2:11-13). Kay kung walay pagkabalaan walay makakita sa Ginoo (Hebreo 14:12). para sa mga anak sa Dios nga nagpaabot sa pagbalik ni kristo gipahimangnoan kita sa 1 Juan 3:2-3:

“Minahal kong mga igsoon, kita karon mga anak na sa Dios, apan wala pa nato matino kon maunsa gayod kita. Ang nasayran nato mao nga inigpadayag na ni kristo mahisama kita kaniya, kay Makita man nato siya sa iyang pagkamao gayod. Ug ang tanan nga nagbaton niining paglaoma diha kang kristo nagputli sa ilang kaugalingon ingon nga putli si kristo”.

### **PAG-APLIKAR NGA MGA PANGUTANA**

- Nakasinati na ba kita sa unang aspeto sa kaluwasan (kaluwasan dinha ni Jesus)?
- Kung luwas na kita (unang aspeto sa kaluwasan) apan dili gusto magbag-o (ikaduhang aspeto sa kaluwasan) madala ba kita inig balik ni kristo (ikatulong aspeto sa kaluwasan)?
- Sa unsang paagi nga makaandam kita sa pagbalik sa atong Ginoo? Naga-andam ba kita?

## **PITO KA TIMAILHAN SA TAWO NGA LUWAS NA**

**(Salvation Series: Lesson 7)**

“Gisulatan ko kamo niini aron kamong tanan nga nagatuo sa ngalan sa anak sa Dios masayod nga kamo may kinabuhing walay katapusan”.

1 Juan 5:13

Si Apostol Juan misulat ngadto sa mga nagtuo kang kristo aron sila masayod nga sila aduna nay kaluwasan (kinabuhing nga walay katapusan). Nagsulat siya aron mawala ang tanang pagduhaduha sa ilang hunahuna ug moabot ang kasigurohan. Ang atong kaluwasan wala nabasi sa atong pagbati kondili sa Pulong sa Dios nga atong gituohan. Adunay mga timailhan sa tawo nga naluwas na dinha ni kristo. Maghisgot kita karon ug pito nga nabasi sa Bilbia. Kining pito masinatian sa tawo nga anaa na sa Ginoo. Ang ubang mga timailhan dili sigurado dihadiha dayon nga makita apan sa ngadto-ngadto Makita gayud kini. Mga timaan kristohanon.

### **MGA TIMAILHAN SA TAWO NGA LUWAS NA UG ANAA KANG KRISTO**

## 1. "ANG PAGMATOUD SA BALANG ESPIRITO NGANHI SA ATONG ESPIRITO NGA KITA ANAK NA SA DIOS".

"makighiusa ang maong Espiritu sa atong espiritu ug magmatoud nga kita mga anak na sa Dios".

Roma 8:16

- Sa dihang atong gidawat si Jesus sa atong kinabuhi ang Espiritu sa Dios mipuyo kanato ug nagmatoud sa atong espiritu (kasingkasing) nga kita mga anak na sa Dios. Ang resulta niini mao ang kasigurohan sa atong kinasuloran nga kita iya na gyud sa Dios (Efeso 1:13-14). Kahibalo nga kahibalo ka nga ikaw luwas na tungod sa imong pagtuo sa kang Jesus. Nakasiguro ka sulod sa imong kasingkasing nga dinha ni kristo ikaw "**anak sa Dios**" ug walay anak sa Dios nga moadto sa "impyerno" uban sa Yawa.

▪

## 2. PAGKAMATINUMANON SA MGA SUGO SA DIOS

" Si Jesus mitubag "Ang nahigugma kanako magtuman sa akong gisugo. Mahigugma kaniya ang akong Amahan, ug ang akong Amahan ug ako moanha ug magpuyo diha kaniya. Ang wala mahigugma kanako dili motuman sa akong gisugo."

Juan 14:23-24

" kon moingon kita nga nahiusa na kita sa Dios apan nagpuyo gihapon diha sa kangitngit, namakak kita ug wala magkinabuhi sumala sa kamatuoran".

1 Juan 1:6

"kon tumanon nato ang mga sugo sa Dios. Mapaniguro nato nga nakaila kita kaniya. Kon may moingon, ' nakaila ako sa Dios". Apan wala magtuman sa iyang mga gisugo, bakakon kanang tawhana ug wala kaniya ang kamatuoran".

1 Juan 2:3-4

- Daghan ang nagsulti nga sila nahigugma sa Dios pero nagpuyo ug kinabuhi nga masupilon. Ang timailhan sa pagkahiusa sa Dios mao ang "pagkamatimuman". Ang pagtuman resulta sa atong relasyon (panaghigugmaay) sa Dios.

Wala kini nagpasabot nga hingpit na kita, peru kung luwas gayod kita ang tinguha sa atong kasingkasing mao ang paglipay sa atong amahan pinaagi sa pagtuman sa iyang balaang espiritu nga ania kanato.

## 3. GUGMA NGADTO SA TANANG TAWO

"Nasayran nato nga nakalatas na kita sa kamatayon ngadto sa kinabuhi, kay gihigugma man nato ang atong isigkatawo; apan ang wala mahigugma anaa pa sa kamatayon. Ang nagdumot sa iyang isigkatawo mamumuno, ug nasayod kamo nga mamumuno wala magbaton sa kinabuhing walay kataposan."

1 Juan 3:14-15

- Nag-ingon ang mga pasahe sa itaas nga ang timailhan kung ikaw nakalatas na gikan sa kamatayon ngadto sa kinabuhi mao nga aduna kanay paghigugma sa imong isigkatawo (apil

ang imong mga kaaway). ang mando ni Ginoong Jesus paghigugma sa imong mga kaaway ug pagbuhat ug maayo sa mga nakapasakit kanimo mabuhay na nimo (Lukas 6:27). kung ikaw anak na sa Dios, mopasaylo ka na, mopanalangin ka na ug mohatag na ug gugma sa tanang tawo (1 Juan 4:7-8).

#### 4. MAKANUNAYON NGA PAGTUBO DINHA SA GINOO

“Sama sa mga bata nga masuso, pangandoy kamo sa gatas nga lunsay’ng espirituhanon, aron sa inyong kaluwasan”

1 Pedro 2:2

- Sa mga bata nga bag-o nangatawo ang dili kapungngan mao ang pagtubo. Ang pagtubo usa ka timaan nga adunay kinabuhi. Ang patay dili na motubo. **Ang espirituhanon nga pagtugbo timaan nga kita natawo sa pamilya sa Dios.** Ang hinayhinay apan makanunayon nga pagtubo dinha sa Ginoo klaro kaayo nga timailhan nga kita nakadawat na sa gasa sa kinabuhi nga walay kataposan.

#### 5. MAKADUNGOG NA SA TINGOG SA DIOS

“...mag-una siya kanila ug ang mga karnero mosunod kaniya, kay nakaila man sila sa iyang tingog.”

- Usa sa mga tawag niadtong mga anaa na kang Kristo sa Biblia mao ang “mga karnero”. Ang itaas nga pasashe nagsulti nga ang mga karnero sa Ginoo makadungog ug mosunod sa

tingog sa ilang Magbalantay (Jesus). Ang mga “kanding” dili makadungog sa tingog sa Ginoo.

- Ang tinuod nga mga anak sa Dios nga nagbaton na sa Espiritu Santo makadawat na ug mga padayag gikan sa Dios (1 Corinto 2:9-10;13-14). Ang tingog sa Espiritu Santo sa ilang kinasuloran kanunay na nila madunggan nga nagdasig, nagatudlo, nagabadlong, ug nagagiya kanila (Roma 8:14; Juan 14:26). Ang mga anak sa Dios makadungog gyud sa tingog sa ilang Amahan.

#### 6. PAG-ALAGAD SA DIOS

“Makita ninyo ang kalahian sa matarong ug sa daotan ug sa nag-alagad kanako ug wala mag-alagad.”

Malaquias 3:18

- Dili makaluwas ang atong mga maayong binuhatan apan ang naluwas na dinha ni Kristo mobuhat gyud sa katuyoan sa Dios (Efeso 2:8-10). Ang itaas nga pasashe nagsulti nga mailhan nimo ang mga iya sa Dios kay sila moalagad kaniya. Si Jesus miingon,

“Kay ang buot moluwas sa iyang kaugalingon kinabuhi mawad-an hinuon niini; apan kadtong maghalad sa iyang kinabuhi alang kanako ug sa Maayong Balita, dili mawad-an niini.”

Marcos 8:35

- Ang tawag nato ngadto kang Kristo dili lang ‘relasyon dinha kaniya’ kondili sa ‘pagpagamit usab kaniya’ aron ang Maayong Balita sa kaluwasan mapakaylap ngadto sa uban.

Ang atong pagdawat kang Kristo dili lang Manluluwas kondili Ginoo (Roma 10:9). Siya na ang atong Agalon. Nagpasabot kini ug pagtuman ug pag-alagad. Sa kinasuloran sa tanang mga “naluwas na” anaa gyud ang dako nga tinguha sa pagpahimuot kaniya pinaagi sa pag-alagad.

- Nagpasabot ba kini nga ang wala pa nangalagad dili pa luwas o mga anak sa Dios? Dili sad. Ang uban wala pa “nakatikang sa pagpangalagad” tungod kay mga bata pa sila sa Ginoo pero ang “tinguha sa pagpangalagad” anaa tungod kay luwas na sila. Anaa pa lang siguro sila sa panahon sa pagsangkap ug pagpangandam sa umaabot nga ministryo (preparation stage).

## **7. KASINGKASING NGA MOTABANG SA MGA NANGINAHANGLAN**

“Alang sa Dios nga Amahan, ang putli ug matuod nga tinuohan mao ang pag-atiman sa mga ilo ug mga biyudo sa ilang kalisod...”

Santiago 1:27

- Ang adunay relasyon sa Dios nagbaton na sa kinaiyahan sa Dios. Ang pagkamanggiluluy-on magsugod na paggawas sa iyang kinabuhi ngadto sa uban. Kaniadto bintahoso ug hakog siya apan karon manggihatagon na sa adunay mga pagkinahanglan.
- Atong nahisgutan sa unahan nga ang mga tinuod nga anaa sa Diyos iyang gitawag ug “karnero” (Juan 10:3-4). Sa Mateo 25:31-46, gihisgotan usab ang mga karnero sa Ginoo. Niini nga parabolo, nga naghisgot sa “adlaw sa paghukom,” iyang gilain ang iyang mga karnero gikan sa mga kanding (ang karnero sa iyang tuo ug ang kanding sa iyang wala). Dinhi

iyang gisulti nga ang kinaiyahan sa “iyang mga karnero” mao ang pag-atiman sa mga nanginahanglan ug ang kinaiyahan sa mga kanding mao ang walay pagpakabana sa mga nanginahanglan sa palibot. Ang iya ni Kristo nagbaton sa kasing-kasing ni Kristo nga mao ang pagtabang sa mga nanginahanglan.

## **PAG-APLIKAR NGA MGA PANGUTANA:**

- ◆ Kining pito ka timailhan sa tawo nga “luwas na” anaa na ba kanimo? Asa ang wala pa?
- ◆ Imo bang nasinatian ang makanunayon nga pagtubo sa imong espirituhanon nga kinabuhi?
- ◆ Nganong importante man kaayo ang espirituhanon nga pagtubo? Moabot ba ang pagtubo kung wala kay buhaton?



## ANG PLANO SA DIOS (Salvation Series Lesson 8)

Ang atong pagahisgutan karon usa sa pinaka-importante kaayo nga pagtulon-an sa Biblia, *“Nganong gibuhat kita sa Dios?” “Unsay plano sa Dios ngadto sa Tawo?”*

### 1. NGANONG GIBUHAT SA DIOS TAWO?

#### i. Relasyon ngadto kaniya

“..ang katawahan nga akong giumol alang sa akong kaugalingon..”

Isaias 43:21

Sa dihang gibuhat sa Dios ang mga anghel, mga hayop, mga isda, mga langgam, ug mga tanaman maayo kini pero wala siyay masuod kanila tungod kay sila sibo sa iyang hulagway. Naghandom ang Dios ug binuhat nga masuod gayod niya, busa miingon siya ngadto sa iyang Anak ug sa balaang Espirito **“Magbuhat kita ug tawo sumala sa atong dagway”** (Genesis 1:26). Gibuhat ang tawo sumala gayod sa hulagway sa Dios. Ang Dios adunay hunahuna ug kaalam, mao usab ang tawo. Mobati ang Dios, Mao usab ang tawo. Aduna siyay abilidad nga mahimog

desisyon kay ang Dios Mao man usab. Balaan siya kay ang Dios balaan man. Ang tawo liwat kaayo sa Dios (pero dili siya Dios). Gituyo niya kini arun makasabot gayud kaniya. **“Relasyon”** ang unang katuyoan nganung gibuhat sa Dios ang tawo (Marcus 12:28-30).

#### ii. Magdumala sa kalibotan

“Buhaton nato ang tawo sama sa atong dagway. Siya maoy magbout sa mga isda, sa mga langgam, sa mga kahayopan, ug sa tanang ihalas nga mananap. Panganak kamog daghan aron malukop ang kalibutan sa inyung liwat ug sila maoy magbout niini; kamoy magbout sa mga isda ug sa mga langgam ug sa tanang ihalas nga mananap”.

Genesis 1:26-28

Ang tawo gihatag ug awtoridad sa Dios aron maoy magdumala sa tanan niyang gibuhat. Ang Dios dili makita tungod kay siya espiritu, pero pinaagi sa tawo nga iyang gibuhat sumala sa iyang panagway Makita siya. **Ang tawo maoy representante dinhi sa yuta sa Dios nga nagpuyo sa langit. Siya maoy “Pisikal” nga representante sa “Espirituhanon” nga Dios.** Gawas sa iyang relasyon sa Dios gitahasan siya nga mag-atiman ug magdumala sa kalibotan.

### 2. NGANONG NAWALA ANG TAWO SA PLANO SA DIOS?

Ang Dios nagbutang ug duha ka kahoy taliwala sa tanaman sa Eden (Genesis 2:16-17). Ang iyang katuyoan nganong nagbutang

siya niini nga kahoy mao ang pagsulay sa tawo kung siya motuman ba gayod kaniya. **Dili mapakita ang gugma kung walay kapilian. Kung adunay gugma aduna gayoy pagtuman sa iyang sugo** ( Juan 14:15). Gimandoan niya ang tawo nga dili mokaon sa kahoy nga magdala ug kamatayon. Mao kini ang iyang paagi aron mapakita sa tawo ang iyang gugma apan nasayod kita nga mihimo gayod ug desisyon si adan pagsupil sa Dios. Wala siya mailad sa yawa sa iyang asawa ang nailad (1 Timoteo 2:14). Nakasala gayod si Adan sa Diso. Giahatagan usab ug tsansa ug panahon si Adan sa Dios nga maghinulsol apan imbis moangkon sa iyang sala, ang Dios ug ang babaye naman hinoun ang iyang gibasol nganong nakabuhay siya niini (Genesis 3:11-12).

Tungod sa iyang **sala** gipapahawa sila sa Dios sa hardin sa Eden kay basin mokaon sila sa “kahoy sa kinabuhi” ug dili na gayod maulian sa ilang kahimtang nga mga “makasasala” na (Genesis 3:22-24). Ang Dios nagplano gihapon pagluwas sa tawo nga nahulog na sa sala (Genesis 3:15).

◆ Tungod sa sala nawala ang tawo sa plano sa Dios. Ang pagsupil sa Dios ug ang pagtuman unsay atong gusto makadaot kanato.

### 3. UNSAY NAHITABO SA TAWO HUMAN SIYA NAHULOG SA SALA?

i. **Nawala ang Himaya sa Dios nga nagputos kanila.** Kaniadto wala nila batia ang kaulaw bisan ug hubo sila tungod sa langitnon nga himaya nga nagsinina kanila (Genesis 2:25). Sa dihang sila nakasala nakita nila ang ilang pagkahubo kay ang “himaya” mipahawa naman gikan kanila

(Genesis 3:7). Ang himaya sa Dios nga nagdala ug kalinaw, kahadlok ug kahaw-ang sa kinabuhi.

ii. **Aduna na silay kahadlok nga moduol sa Dios.** Kaniadto sa wala pa sila makasala maayo ug lalom ang ilang relasyon sa Dios pero karon mahadlok na sila moduol kaniya (Genesis 3:10).

iii. **Miabot ang tunglo sa ilang kinabuhi.** Nahimong tinunglo ang ilang kinabuhi, relasyon, pangita ug panuigon (Genesis 3:16-19). Nahimong “buwisit” ang kinabuhi sa tawo tungod sa sala. Ang sala nagdala ug dakong kasamok sa tawo.

### 4. UNSAY PAMAAGI SA DIOS ARON MABALIK ANG TAWO SA IYANG KATUYOAN?

“...Siya usab ang nagpasig-uli kanato kaniya pinaagi kang Kristo...Maoy among mensahe nga *ipasig-uli sa Dios ang tanang tawo ngadto kaniya pinaagi kang Kristo*. Ang Dios wala na mag-isip sa ilang mga sala.

2 Corinto 5:18-19

◆ Si **Kristo** lang ang solusyon aron ang tawo mabalik ngadto sa plano sa Dios!

### 5. UNSAY BUHATON SA TAWO ARON MAHIBALIK SIYA SA PLANO SA DIOS?

**Papuy-a si Kristo ug Paglakaw Uban Kaniya**

Dawaton nato si Kristo nganhi sa atong kasingkasing isip Ginoo ug magkinabuhi kita uban kaniya (Colosas 2:6-7). Dili igo nga kita naluwas sa atong mga sala apan ang importante usab nga mopadayon kita pagpalalom sa atong pag-ila kaniya. Mao kini ang unang katuyoan nganong gibuhat kita sa Dios, “**pakig-relasyon kaniya.**’

### **Pagdumala uban ni Kristo**

Gamiton usab nato ang atong awtoridad batok sa sala, sakit ug sa tanang buhat sa panulay. Timan-an nato nga gibuhat kita para magdumala sa kalibotan. Para magpuyo nga madaogon sa tanang lugar ug sa tanang panahon. **Dili nato kalimtan nga dinha kang Kristo nahimo kitang mga representante sa Dios dinhi sa yuta aron siya nga dili makita, makita pinaagi kanato.**

### **PAG-APLIKAR SA KAUGALINGON:**

- ◆ Importante ba nga ang katuyoan sa Dios nganhi kanato matuman? Ngano man?
- ◆ Sa unsang paagi nga mabatonan nato ang tinuod nga kagawasan?
- ◆ Ato bang masulti nga nagadumala kita uban kang Kristo ginamit ang atong awtoridad?

## **PAGKATAWO PAG-USAB**

**( Salvation Series: Lesson 9)**

Una kita maghisgot unsa ang “***pagkatawo pag-usab***” o “***Born again***” ato usang pagahisgotan unsa ang mga sayop nga mga panghunahuna mahitungod niini. Una sa tanan ang ‘born again’ dili sekta sa relihiyon nga puwede ka mobalhin para mahimong usa ka parte niini. Ang “born again” dili pagbag-o sa kaugalingon pinaagi sa tawhanong paningkamot. Pipila kanato kung makakita ug tawo nga nagbag-o, maghunahuna dayon nga siya nag ‘born again,’ pero kini nga panghunahuna sayop. Ang uban usab nagatuo nga kita na ‘born again’ sa dihang nabautismohan kita sa tubig pinaagi sa pagpisik-pisik (para sa mga bata) o pinaagi sa pag-unlod (para sa mga dagko). ilang gitan-aw ang pagka ‘born agin’ nga usa ka gawas nga kasinatian pinaagi sa pagbautismo sa tubig. Kini nga pagtuo dili sibo sa Biblia. Ato lang gigamit ang pulong ‘born again’ sa itaas kay mao kini ang ilado kaayo nga pulong pero ang bisaya niini mao ang ‘**pagkatawo pag-usab**’ nga mao nay atong gamiton sa unahan.

### **1. Unsa ang pagkatawo pag-usab ?**

“ wala sila mahimong mga anak sa Dios sa paagi nga tawhanon – wala sila mangtawo nga mga anak sa tawhanong amahan, kay ang Dios mismo mao ang ilang amahan”.

Juan 1:13

Ang “pagkatawo pag-usab” usa ka **kasinatian** diin ang usa ka tawo natawo sa pamilya sa Dios. Kini nga pagkatawo espirituhanon nga minugna sa espiritu sa Dios. Nag-ingon ang

Ginoo, “...ang gianak sa espiritu, espiritu usab” (Juan 3:6). Ang pagktawo pag-usab’ dili sekta sa relihiyon. Dili pagbag-o sa kaugalingon sa tawhanon nga pamaagi, o pagbautismo sa tubig kon dili “**espirituhanon nga kasinatian diin natawo ang us aka tawo ngadto sa pamilya sa Dios**”.

## 2. Nganong kinahanglan man kita matawo sa pamilya sa Dios? Dili ba diay mga anak sa Dios ang tanang tawo sa kalibotan?

“ ang kalainan sa **mga anak sa Dios** ug sa mga **anak sa yawa** mao kini; ang wala magbuhat sa matarong o wala mahigugma sa iyang isigkatawo, dili anak sa Dios”.

1 Juan 3:10

### Duha ka klase nga mga tawo

Tanang tawo binuhat sa Dios pero dili tanang tawo mga anak sa Dios. Atong Makita sa itaas nga bersikulo nga adunay mga tawo nga anak sa Dios ug adunay mga tawo nga anak sa Yawa. Si Jesus mitawag sa mga relihiyosong mga makasasala ug mga anak ug mga anak sa Yawa ang amahan sa tanang bakakon (Juan 8:44). Duha lang ka klase ang mga tawo sa tibouk kalibotan: mga anak sa Dios ug mga anak sa Yawa (1 Juan 3:10)

### Duha ka klase nga pagkatawo

Ang Biblia nagahisgot ug duha ka pagtawo, “**Ang gianak sa tawo, tawo usab; ug ang gianak sa Espiritu, esprirtu usab**”(Juan 3:6). Ang tawhanon nga pagkatawo (pagkatawo sa tubig) ug esprirtuhanon nga pagkatawo (pagkatawo sa Espiritu) (Juan 3:5). Ang unang pagkatawo nahitabo sa dihang natawo kita sa tago-angkan sa atong inahan. Niini nga pagkatawo adunay

“panubigon” (bag of water). Niining unang pagktawo, natawo kita uban sa “panulondon nga sala’ ( Salmo 51:5). Ato kining napanunod kang Adan diin ang iyang sala ug pagkamakakaksala napasa ngadto sa tanang kaliwatan (Roma 5:12)

Ang sala ug kamtayon napasa ngadto sa tanang tawo busa mao kini ang kahimtang sa tanang tawo sa kalibotan (Galacia 3:22). Wala nagpasabot nga ang mga bata kung mamatay moadto sa impyerno, tungod kay wala pa silay buot (age of innocence) ug wala pa sila sa edad diin manubag sila sa ilang mga binuhatan (age of accountability) busa ang Gingharian sa Dios alang kanila (Mateo 19:14) . Pero ang kamatuoran tanang tawo makasasala ug tungod niini...

- i. Patay sila espiritu o nahimulag sa Dios (Efeso 2:1; Roma 6:23)
- ii. Iya sila sa yawa (Efeso 2:2;1 Juan 3:8)
- iii. Padulong sila sa Impyerno (Mateo 25:41)

Mao kini ang pinakarason nganong miingon si Jesus nga kinahanglan matawo pag-usab. Katulo kini gibalikbalik ni Jesus sa iyang pakighinabi ni Nicodemo busa importante gayod kini kaayo (Juan 3:3,5,7). Natawo ka nga patay sa espiritu, kinahanglan matawo ka pag-usab aron mabuhi sa espirituhanon nga bahin. **Tungod sa sala iya ka sa yawa, mao nga kinahanglan ka matawo pag-usab aron mahiusa sa Amahan sa langit ug mahimong iyang anak.** Natawo ka nga makasasala kinahanglan matawo ka pag-usab aron mahimong matarong Tungod sa sala ang imong padulngan kalaglagan, mao nga

kinahanglan ka matawo pag-usab aron makabaton ug kasigurohan sa Gingharian sa Diso (Juan 3:3).

### 3. Unsaon nato para matawo kita pag-usab?

“ hinoun, may midawat ug mitou kaniya; busa sila gihatagan niya ug katungod nga mahimong anak sa Dios. Wala sila mahimong anak sa Dios sa paagi nga tawhanon----- wala sila mangatawo nga mga anak sa tawhanong Amahan, kay ang Dios mismo mao ang ilang amahan”.

Juan 1:12-13

Matawo ka pag-usab kugn imong ibutang ang imong pagtuo ug pagsalig ngadto kang Jesus para sa kapasayloan sa imong mga sala ug sa kompleto nga pagkahiusa ngadto sa Dios nga Amahan. Kung ang usa ka tawo motugyan sa iyang kinabuhi ngadto kang Jesus matawo siya pag-usab ngadto sa pamilya sa Dios. Nag-ingon ang Biblia, **“Pinaagi sa pagtuo kamong tanan nahimong anak sa Dios sa pagpakipaghiusa ninyo kang kristo Jesus”**(Galacia 3:26). Pinaagi sa atong pagtuo kang Jesus nahimo kitang mga tanak sa Dios ug ang Dios nahimong ato nang Amahan!

### 4. Unsa may mosunod human kita matawo sa pamilya sa Dios?

Si Apostol Pablo mitawag sa mga kristohanun sa Corinto nga mga bata pa dinha ni kristo (1 Corinto 3:1).Sa dihang natawo kita niining kalibotana, natawo kita nga mga bata ug dili mga hamtong na dayon. Mao gihapon sa espirituhanon nga bahin. **Sa dihang natawo kita ngadto sa pamilya sa Dios natawo kita nga mga “bata pa sa Ginoo” ug dili mga “hamtong na sa Ginoo”**. Busa human kita matawo ngadto sa pamilya sa Dios

kinahanglan mutobo kita ug mohamtong diha ni kristo. Ang kausaban kinahanglan mosunod human kita maluwas.

### PAG-APLIKAR NGA MGA PANGUTANA:

- Sigurado ka na ba nga ikaw anak sa Dios? Nganu man?
- Unsay mga kalainan sa mga bata pa sa Ginoo ug niadtung mga hamtong na?
- Unsay mga benepisyo kung hamtong na kita nga mga Kristohanon?
- Unsay atong buhaton aron motubo ug mohamtong kita dinha sa Ginoo?

## **ANAK SA DIYOS**

### **(Salvation Series: Lesson 10)**

**“Hinupon, may midawat ug mituo kaniya; busa sila gihatagan niya sa katungod nga mahimong mga anak sa Dios. Wala sila mahimong mga anak sa Dios sa pinaagi nga tawhanon--wala sila mangatawo nga mga anak sa tawhanong amahan, kay ang Dios mismo mao ang ilang Amahan.”**

Juan 1:12-13

Si Jesus mianhi aron pagluwas kanato gikan sa sala, panulay, tunglo, ug kamatayon. Apan labaw niining tanan mianhi usab siya aron paghimo kanatong mga anak sa Dios ug pagpaila nga ang Dios ato nang Amahan. Pinaagi kaniya nahiusa na kita sa atong Langitnon nga Amahan (Juan 14:6;1 Juan 2:23). karon nga mga anak na kita sa Dios unsa may atong ibalos (response) ngadto sa iyang dakong gugma nganhi kanato? Si Jesus ang atong modelo unsaon pagpuyo isip anak sa Dios. Gitawag kita paglakaw ug pagkinabuhi sama kang Jesus (1 Juan 2:6). Unsay iyang gibuhay mabuhay usab nato (Juan 14:12). Atong tan-awon karon unsay gitudlo ug gi-modelo ni Ginoong Jesus isip usa ka anak sa Dios.

### **TUNGOD KAY MGA ANAK NA KITA SA DIOS....**

#### **1. Kinahanglan makita ang kinaiya sa atong Amahan nganhi kanato.**

- Sama nga si Jesus mapadayag sa kaniya sa Amahan ngadto sa uban (Juan 14:7-10) kita usab mopadayag sa kinaiyahan sa Amahan ngadto sa mga tawo nga

nagapalibot kanato. Ang mga dili magtutuo dili makabuhay niini tungod kay wala pa sila nagbaton sa kinaiyaan sa Dios hinuon sa kinaiyaan ni Satanas ang amahan sa tanang bakak (Juan 8:44). Pero kita nga mga anak sa Dios nakabaton na sa kinaiyahan sa Dios (1 Juan 3:9) ug kinahanglan nga ato kining ipadayag ngadto sa uaban aron sila modayeg sa atong Amahan sa langit (Mateo 5:16). Dili mahimo nga ang atong kinabuhi ug kinaiya pareho lang gihapon sa mga wala pa sa Ginoo. Aduna gyuy dakong kalahian ang mga anak anak sa Dios ug ang mga anak sa Yawa (1 Juan 3:10). Lahi gyud ta nga nahiusa na sa atong Amahan sa langit. Kinahanglan moliwat gayod kita sa atong Amahan. Mao kini ang gitudlo ni Ginoong Jesus (Mateo 5:43-48).

#### **2. Kinahanglan nga ang tanan natong buhaton para pagpahimuot kaniya.**

- Motibo sa tanang gibuhay ni Jesus sa dihang nagpuyo siya dinhi sa kalibotan mao ang pagpahimuot sa iyang Amahan (Juan 8:29) . Wala siya nangita ug pagdayeg sa tawo kondili ang pagdayeg sa iyang Amahan sa langit (Juan 5:41-44). Si Jesus mitudlo nga mao usab kini ang atong buhaton. Ang tanan natong buhaton para sa kahimayaan sa atong Amahan sa langit dili para sa tawo o para sa atong kaugalingon. Kung ato kining buhaton ang atong Amahan maga-ganti kanato (Mateo 6:1-4, 5-6, 16-18).

#### **3. Kinahanglan nato ipalalom ang atong relasyon Kaniya.**

- Tungod kay aduna na kitay relasyon sa atong Amahan sa langit ato kining ipalalom pinaagi sa paghatag ug igong panahon dinha sa pakighinabi kaniya. Si Jesus

miiingon, ‘...sulod sa imong lawak, unya takpi ang pultahan, ug pag-ampo sa imong Amahan nga dili makita” (Mateo 6:6). Mao kini ang ehemplo nga gipakita ni Jesus nganhi kanato sa Bibilia. Una siya motrabaho ug moministeryo sa uban makighinabi usa siya sa iyang Amahan sa langit (Marcos 1:35). Aduanay mga panahon nga biyaan niya ang tanang ginabuhat para lang makighinabi o makig-istorya sa iyang Amahan (Lukas 4:42;5:16;6:12).

#### **4. Kinahanglan maglakaw kita sa Iyang hingpit nga kabubut-on.**

- Si Jesus miingon, “*Dili ang tanan nga magtawag kanako ‘Ginoo, Ginoo,’ makasulod sa Ginharian sa langit, kondili kadto lamang nagtuman sa kabubut-on sa akong Amahan nga atua sa langit*” (Mateo 7:21). Ang tinuod nga mga anak sa Dios wala lang nagtinguha pagtuman sa kabubut-on sa ilang Amahan kondili nagtuman gayod. Ang ilang pag-ampo nga sila magalakaw kanunay sa hingpit nga kabubut-on sa Amahan (Mateo 6:10). Si Jesus nga atong modelo nagpakita usab kanato niini nga ehemplo. Mobuhat lang siya ug butang kung kini hingpit nga kabubut-on sa Amahan sa langit (Juan 5:19).

#### **5. Kinahanglan mosalig kita Kaniya sa atong mga adlaw-adlaw nga panginahanglan.**

- Si Jesus mitudlo kanato nga parte sa atong pag-ampo mao ang pagpangayo sa tong mga adlaw-adlaw nga panginahanglanon (Mateo 6:11). Ang parte sa mga anak mao ang pagpangayo ug ang parte sa Amahan mao ang pagtagbo unsay gipangayo (Mateo 7:7-11). (Wala kini nagpasabot nga dili na kita motrabaho apan atong

sabton nga kung wala ang pabor sa Dios wala kitay mahimo.) Katungdanan sa Amahan ang pagtagbo sa mga panginahanglanon sa ilang mga anak busa anaa kita sa Iyang hingpit nga kabubut-on aron anaa kita sa posisyon nga modawat sa iyang gusto ihatag kanato. (Mateo 6:33).

#### **6. Kinahanglan maglakaw kita nga putli ug balaan sa iyang atubangan.**

- Tungod kay mga anak na kita sa Dios dumtan nato ang iyang gidumtan ug higugmaon ang iyang mga gihigugma. Dumtan nato ang sala ug tanang daotan (1 tesalonica 5:21-22). kung adunay sala sa atong kasingkasing kinahanglan ato kining hinulsolan ug ikumpisal sa atong Amahan aron siya mopasaylo kanato ug mohinlo sa atong kasingkasing (Mateo 6:12; 1 Juan 1:9) Ayaw tugoti nga adunay sala sa imong kasingkasing nga magpabilin. Ayaw usab tugoti nga adunay tawo nga wala pa nimo napasaylo (Mateo 6:14-15). Pasayloa sila kay ang Amahan nagpasaylo naman kanimo dinha ni Kristo (Efeso 4:32).

#### **7. Kinahanglan mangayo kita kanunay sa iyang panalipod.**

- Ang mga amahan mopanalipod gayod sa ilang mga anak gikan sa tanang daotan. Parte sa atong mga pag-ampo mao ang pagpangayo ug panalipod gikan sa atong Amahan sa langit. Mangayo kita kaniya ug giya sa tanan natong mga lakaw ug ginabuhat aron dili kita maadto sa daotan ug mahulog sa tintasyon. Malipay siyang manalipod kanato gikan sa panulay.

#### **8. Kinahanglan ato siyang alagaran.**

- Ang tanang buotang mga anak mohatag ug kalipay sa ilang mga amahan pinaagi sa pagtabang unsay trabahoon sa panimalay. Sa nagpangidaron ug 12 si Jesus nagsugod na siya pag-apil sa trabaho sa iyang Amahan sa langit. (Lukas 2:42,49). Si Jesus ang atong ehemplo. Mianhi siya aron pagbuhat sa katuyoan nga gisangon kaniya sa Amahan ug ang paghuma niini (Juan 4:34). Didto sa krus nahuman ni Jesus ang iyang misyon pagbayad sa tanang sala sa kalibotan. Ang tinuod nga mga anak sa Dios moalagad gyud sa ilang Amahan sama kang Jesus (Mateo 6:24). Ang ilang panan-awon mao ang pagtigom ug bahandi didto sa langit (Mateo 6:19-21). Ang katuyoan sa mga anak sa Dios mao ang paghuman sa trabaho sa ilang Amahan sa langit dinhi sa yuta (Mateo 28:19-20).

#### **PAG-APLIKAR SA KAUGALINGON:**

- ❖ Sa dihang atong nasabtan nga kita mga anak sa Dios unsay nausab kanato?
- ❖ Maayo ba kita nga anak sa Dios? Napataas ug nahimaya ba siya sa atong kinbuhi?
- ❖ Maapektohan ba ang Amahan kung ang anak nagpabadlong?



## LANGITNONG AMAHAN (Salvation Series: Lesson 11)

### ADUNAY DUHA KA KATUYOAN NGANONG MIANHI SI JESUS SA KALIBOTAN

#### 1. Pagluwas kanato gikan sa sala ug paghiusa kanato ngadto sa Dios.

- Ang unang katuyoab nganong mianhi si Jesus sa kalibotan mao ang pagluwas kanato sa sala nga nagdala ug kamatayon ug paghiusa kanato ngadto sa Dios (Mateo 1:21; Lukas 19:10; 2 Corinto 5:19). Mao kini ang iyang gibuhad didto sa krus.

#### 2. Pagpaila sa Dios nga usa ka Amahan.

- Dili igo ang pag-ila kinsa si Jesus tungod kay siya mianhi aron madala kita ngadto sa Amahan. Si Jesus ang dalan paingon sa Amahan (Juan 14:6). Ang 'dalan' dili mao ang kataposan hinuon mohatod kini kanato sa usa ka 'destinasyon.' **Si Jesus mao ang dalan nga mohatod kanato ngadto sa destinasyon nga mao ang Amahan.**
- Si Jesus mipaila sa pangalan sa Dios ngadto sa iyang mga disipolo (Juan 17:6,26). Dili kini ang pangalang **"ELOHIM"** o ang pangalang **"JEHOVAH"** Tungod kay ang mga Judio dugay nang nakaila niini nga pangalan. Unsa kini nga pangalan? **AMAHAN.** Niini nga kapitulo (Juan 17) sa pag-ampo ni Jesus ka unom niya gitawag ang Dios nga Amahan.

Sa libro sa Juan adunay 122 ka bisis nga gitawag ang Dios ug "Amahan."

- Sa nanglabay' ng panahon nakig-istorya ang Dios kanato pinaagi sa mga propeta apan niining kataposang mga adlaw nakig-istorya siya pinaagi sa iyang Anak (Hebreo 1:1-2). Si Jesus ang Anak sa Dios adunay mensahe nga wala mawali sa mga nanglabay'ng mga mensahero-----ug ang mensahe mao nga, *'siya ang Anak nga gipadala sa iyang Amahan sa langit aron paghatag ug kinabuhi sa tanan nga motuo kaniya'* (Juan 5:36-40). **Kung sila motuo ug modawat kaniya mahimo usab silang mga anak sa Dios ug ang Dios mahimo na usab nga ilang Amahan** (Juan1:12-13; Galacia 3:26; Juan 20:17).
- Miingon si Jesus nga walay sa Amahan gawas kaniya ug makaila lang kita sa Amahan kung iya kitang padaygan niini (Mateo 11:27). Si Kristo lang ang makapaila sa Dios nga Amahan nganhi kanato ug wala nay lain. Mianhi siya pagpaila sa Amahan!
- Si Jesus mipaila sa Langitnong Amahan ngadto sa iyang mga tinun-an dili lang sa pagtudlo ug pagwali bahin sa Amahan kon dili pinaagi sa Iyang pagkinabuhi. Ang kinaiya ug himaya sa Amahan napasundayag diha sa Anak. Kinsa kadtong nakakita kaniya nakakita na sa Amahan (Juan 14:8-11). Si Jesus mao ang hulagway sa Amahan sa langit.
- Si nakighinabi kanunay sa Dios usa ka Anak ngadto sa Amahan (Juan 11:41; 17:1). Makita nato sa Bibilia nga si Jesus kanunay motawag sa Dios nga "Amahan."

- Gitudloan usab kita niya pagbuhat niini sa atong mga pag-ampo. Nag-ingon siya, “Ingna niini pag-ampo: **‘Amahan namo nga anaa sa langit’** (Mateo 6:9). Mao usab kini ang gitudlo ni Apostol Pablo nga, **“tawgon nato ang Dios nga Amahan”** (Efeso 5:20). Kung imong tan-awon pag-ayo ang mga manunulat sa Bag-ong Tugon, sila nagtudlo nga ang Diyos usa ka Amahan ug angayan nga tawgon ug ilhon nato siya nga Amahan.

## GIUNSA PAGHULAGWAY ANG ATONG LANGITNONG AMAHAN SA BIBLIA?

### 1. Maayo siya nga Amahan

“Ang tanang maayo ug hingpit nga gasa naggikan sa langit; gikan kini sa Amahan nga maoy nagbuhat sa mga kahayag diha sa langit. Dili gayod siya mausab ni magpakita ug landong sa pagkausab.”

Santiago 1:17

- Dili siya mohatag ug sakit, kapobrehon, ug kadaot kay Amahan siya sa panalagin!

### 2. Manggihatagon siya nga Amahan

“kamong mga Amahan, hatagan ba ninyog bato ang inyong anak kon siya mangayog pan? O hatagan ba niniyog bitin kon mangayog isda? Kon kamo nga mga daotan mahibalong mohatag ug maayong butang ngadto sa inyong mga anak, unsa pa kaha ang inyong Amahan nga atua sa langit? Mohatag gayod siya sa mga maayong butang niadtong mangayo kaniya!”

Mateo 7:9-11

### 3. Nagapanalipod siya nga Amahan

“Ang akong Amahan, nga maoy naghatag nila ngari kanako, labaw sa tanan” ug walay makaagaw kanila gikan sa Amahan.”

Juan 10:29

### 4. Mahigugmaon siya nga Amahan

“Palandongang ninyo unsa kadako ang paghigugma sa Amahan kanato! Gihigugma kita niya pag-ayo tungod niini giisip kitang mga anak sa Dios ug kini matuod gayod.”  
1 Juan 3:1

### 5. Modisiplina siya nga Amahan

“Antosa ang pagkastigo kaninyo ingon nga kini gikan sa inyong Amahan, kay nagpaila kini nga giisip kamo sa Dios nga iyang mga anak. May anak ba god nga dili kastigohon sa iyang Amahan? Kon kamo dili kastigohon sama sa gihimo sa Dios sa tanan niyang mga anak, nan dili kamo tinuod nga mga anak niya kondili mga pinaangkan. Kon ang atong mga tawhanong amahan nagkastigo kanato ug gitahod ta gihapon sila, labi pang dawaton nato ang pagkastigo sa atong espirituhanong Amahan aron makabaton kitag kinabuhi.... nagbuhat niini ang Dios alang sa atong kaugalingong kaayohan aron makaambit kita sa iyang pagkabalaan. Kon kastigohon kita, makasubo kini kanato inay makalipay. Apan sa kaulahian kadtong nakadawat sa maong pagpanton makaani sa kinabuhing matarong ug ganting malinawon.”

Hebreo 12:7-11

## **UNSAY MGA BENEPISYO KUNG MAILHAN ANG DIOS ISIP AMAHAN?**

### **1. Pag-ila kung kinsa kia (identity)**

- Kung atong mailhan kinsa ang Dios ato usang mailhan kung kinsa kita. Kung ang Dios atong Amahan kita usab Iyang mga anak. Dinha ni Kristo nahimo kitang mga anak sa Dios ug ang Dios nahimong atong Amahan (Juan 1:12-13; Galacia 3:26).

### **2. Pagbaton ug bili sa kaugalingon (self worth)**

- Kung atong nasabtan nga ang atong Amahan nahigugma pag-ayo kanato kita usab kahibalo na mohigugma sa atong kaugalingon sama nga kita gitan-aw sa atong Langitnong Amahan. Bililhon ug importante kita sa iyang atubangan!

### **3. Kasigurohan (security)**

- Makabaton kita ug kasigurohan kung atong masabtan nga ang atong Amahan malipay nga mohatag kanato sa tanang makaayo kanato (Lucas 12:32; Roma 8:32). Wala kitay kabalaka ug kaguol sama sa bata nga nakig-uban sa iyang amahan. Gitagbo man gani niya ang mga panginahanglanon sa mga langgam ug mga tanom kita pa kaha nga iyang mga anak (Mateo 6:25-33).
- Ang problema sa ubang mga anak sa Dios wala sila sa sulod sa panimalay sa ilang Amahan busa ilang nahiagom ang daghang mga kalisdanan ug kasamok (Lukas 15:13-16). Kinahanglan sila mahigmata ug mobalik sa panimalay sa ilang Amahan (kabubut-on sa Dios) aron ilang masinatian ang presensiya sa Amahan, ang kabag-ohan sa kinabuhi

(maanindot nga bisti), ang awtoridad sa Dios (singsing), ang ministeryo (sapatos), ug ang madagayong pagtagbo sa ilang mga panginahanglanon (nating baka). Ang kasigurohan moabot lang kanato kung anaa kita sa kiliran sa atong Amahan sa langit. Ang mga “backslider” walay kasigurohan.

### **4. Rason sa pagpangalagad (motivation for service)**

- Tanang maayong anak gusto molipay sa ilang mga amahan . si Jesus nagbuhat lang sa hingpit nga kabubut-on sa iyang Amahan ug wala nay lain (Juan 4:34; 5:19). Nasayod siya nga pinaagi niini mahimuot ang iyang Amahan (Juan 8:28-29). Kita usab , kinahanglan nga ang atong kalipay mao ang pagpahimuot sa atong Amahan sa langit pinaagi sa pagbuhat sa iyang kabubut-on.

### **5. Pagsabot nga adunay panimalay didto sa langit (awareness of home in heaven)**

- Karon nga atong nasabtan nga ang Dios usa ka Amahan ang langit nga mao ang puloy-anan sa mga matarong (Juan 14:2; Filipos 3:20) dili lang usa ka puloy-anan nga puno sa mga maayong butang (house) kondili usa na ka panimalay nga puno sa gugma (home).

## **UNSAY ATONG HIMUON ARON MAILHAN ANG DIOS ISIP USA KA AMAHAN?**

1. Ingna ang Balaang Espiritu nga ablihan ang imong mga ‘espirituhanong mata’ aron imong makita ang Dios isip usa ka mahigugmaon ug maayo nga Amahan (Roma 8:15).
2. Sugdi pagtawag ang Dios nga Amahan (Mateo 6:9).

3. Ipalalom ang imong relasyon kaniya pinaagi sa pag-ampo (Mateo 6:6).

### UNSAY ATONG BANTAYAN SA ATONG RELASYON SA AMAHAN NGA LANGITNON?

- 1) Bantayi nga dili mapulihan ang imong “paglakaw uban Kaniya” sa imong “pagtrabaho para Kaniya.” Una ang tanan dapat mauna ang lalom nga relasyon sa atong Amahan.
- 2) Bantayi nga sa imong pagduol kaniya dili mga butang ang sentro kondili siya. Unaha pagpangita ang iyang nawong una ang iyang kamot. **Relasyon ang iyang gusto, relasyon ang ihatag kaniya.** Siya ang unang nahigugma kanato balosan nato siya ug gugma.

### PAG-APLIKAR SA KAUGALINGON:

- ❖ Amahan na ba ang atong pagtan-aw sa Dios o Agalon pa? Unsay kalahian sa duha?
- ❖ Unsay mga rason nganong ang uban dili makatan-aw sa Dios isip Amahan?

## BAUTISMO SA TUBIG

(Salvation Series: Lesson 12)

### 1. UNSA ANG BAUTISMO SA TUBIG?

“Busa panlakaw kamo ngadto sa tanang katawhan sa tibuok kalibotan ug himoa sila nga akong mga tinun-an, **ug bunyagi sila** sa ngalan sa Amahan, sa Anak ug sa Espiritu Santo...”

Mateo 28:19

- Gimandoan ni Ginoong Jesus ang iyang mga disipolo nga manghimo ug mga tinun-an ug paga-bautismohan kini sa tubig. Ang bautismo sa tubig ***usa ka sugo o mando*** nga gikan sa atong Ginoo para sa tanan niyang mga magtutuo ug tinun-an.

### 2. UNSAY KAHULOGAN SA BAUTISMO SA TUBIG?

- Ang pulong “**bautismo**” sa Grego nga pinulongan mao ang “**baptizo**” nga ang kahulogan mao “***ang pag-unlod***” o sa English pa “***to immerse***.” Sa ato pa, ang pasabot sa bautismo sa tubig mao “***ang pag-unlod sa tubig***.”

### 3. UNSAY KALAMBIGITAN NIINI SA ATONG PAGLAKAW DINHA NI KRISTO?

“Nasayod kamo nga sa pagbunyag kanato nahiusa kita kang Kristo Jesus, busa nahiusa kita sa iyang **kamatayon**. Tungod niini, sa pagbunyag kanato **gilubong** kita uban kaniya ug miambit sa iyang kamatayon, aron ingon nga si Kristo **gibanhaw** sa mahimayaong gahom sa Amahan, kita usab magpuyo diha sa bag-ong kinabuhi.”

Roma 6:3-4

- Ang bautismo sa tubig nagsimbolo sa atong pagkahiusa kang Kristo sa iyang kamatayon, **paglubong ug pagkabanhaw**. Sa dihang I-unlad o ituslob kita sa tubig atong gilubong ang atong daan nga pagkatawo nga patay na diha ni Kristo ug sa dihang kita gihaw-as sa tubig nagsimbolo kini sa atong pagkabanhaw uban ni Kristo sa bag-ong kinabuhi. (Basah ang Colosas 2:12-13).

#### **4. PAGABAUTISMOHAN BA ANG MGA BATA NGA WALA PAY BUOT?**

- Dili, tungod kay ang bautismo sa tubig para lang sa mga aduna nay pagsabot unsay kahulogan niini. Wala kay makitang bersikulo sa Biblia nga naghigot nga adunay bata nga nabunyagan o nabautismohan. Ang mga bat sa Bibilia ginahalad sa templo sama kang Jesus nga gihalad sa iyang ginikanan sa walo pa lang siya ka adlaw (Lukas 2:21-22).

#### **5. UNSAY MGA GIKINAHANGLAN ARON PUWEDE KA MABAUTISMOHAN?**

- I. **Paghinulsol sa mga sala** -- “ Ang tagsatagsa kaninyo kinahanglan maghinulsol ug mapabunyag....” (Buhat 2:38).
  - II. **Pagtuo kang Kristo** --- “ Ang motuo ug magpabunyag ....” (Marcos 16:16).
  - III. **Pagsunod sa Ginoo** --- “himoa sila nga akong mga tinun-an, ug bunyagi sila” (Mateo 28:19).
- Kung kita naghinulsol n, nagtuo ug nagsunod na sa Ginoo puwede na kita bautismohan sa tubig.

#### **6. MAKALUWAS BA ANG BAUTISMO SA TUBIG?**

- Dili, tungod kay ang kaluwasan mabatonan lang nato pinaagi sa atong pagtuo kang Ginoong Jesus (Buhat 16:31). Ang kaluwasan usa ka “gasa sa Dios ug dili kini makuha sa atong mga paningkamot, bisan ug magpabautismo pa kita (Efeso 2:8-9)
- Adunay mga tawo nga nahisgutan sa Bibilia nga ‘*naluwas*’ bisan ug wala mabautismohan sa tubig. Si Saqueo nga usa ka tikasan nakabaton ug dihadiha nga kaluwasan tungod sa iyang mahinolsolon nga kasingkasing (Lukas 19:8-10) ug mga tulisan nga gilansang sa krus uban ni Jesus, nga mituo nga siya ang Mesiyas (Lukas 23:40-43).
- Dili makaluwas ang bautismo sa tubig, hinuon bunga kini sa atong kaluwasan . ang pagpabautismo gawasnon nga pagpadayag sa kausaban nga atong nabatonan sulod sa atong kasing-kasing (Outward manifestation of an inner change).

#### **7. NGANONG KINAHANGLAN MAN KITA MAGPABAUTISMO?**

##### **Adunay tulo ka rason nganong kita magpabautismo sa tubig:**

- i. **Aron pagtuman sa sugo sa atong Ginoo** ----atong nasabtan nga ang bautismo sa tubig mando gikan kang Kristo ngadto sa tanang sumosunod kaniya (Mateo 28:19).
- ii. **Aron mapakita ang atong pagtuo** ---- selyo kini sa atong pagtuo sa Ginoo (Marcos 16:16). Kung aduna kitay pagtuo magpabautismo gyud kita sa tubig (Buhat 8:12-13). Sama nga ang pagtuo nga walay buhat patay ( Santiago 2:26), ang

pagtuo sa Ginoo nga walay pagtuman sa 'pagbautismo sa tubig' patay.

- iii. **Aron atong masunod gayod si Kristo** ---- si Jesus sa iyang kapanahonan nagpabautismo kang Juan aron pagtuman gayod sa tanang gisugo sa Amahan ngadto kaniya (Mateo 3:13-15). Nagpabautismo ang atong Ginoo aron kita nga sumosunod niya magpabautismo usab. Nagpabautismo man gani si Jesus kita pa kaha!

## 8. SA UNSANG PANGALAN KITA PAGABAUTISMOHAN?

- Ang mando ni Ginoong Jesus, nga pagabautismohan kita sa pangalan **sa Amahan, sa Anak, ug sa Espiritu Santo**.

## 9. KANUS-A KITA MAGPABAUTISMO?

- Karon, sa dihang nakasabot kita unsay kahulogan niini. Kung kita andam na mobiya ug molubong sa atong daang pagkatawo ug magkinabuhi na sa uban sa Ginoo andam na kita sa bautismo sa tubig. Kung ugaling masayop kita human sa bautismo sa tubig aduna na kitay mahinumduman nga 'kita patay na sa sala ug bag-o nang binuhat dinha ni Kristo Jesus. 'Ayaw paghulat nga mahingpit ka ayha kapa magpabautismo. Tumana ang Dios karon. Pagpabautismo na.

## PAG-APLIKAR NGA MGA PANGUTAN:

- ❖ Nganong dili pwede bautismohan ang mga bata nga wala pay buot?
- ❖ Kinahanglan ba nga mahimo hingpit o perpekto una kita magpabautismo?
- ❖ Andam kanaba motuman sa mando sa Ginoo pagpabautismo sa tubig?